

Dayak Paser: Bible for Matthew
Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Matthew

Chapter 1

¹Endo doko karan-karan kturunan Yesus Kristus, pea Daud, pea Abraham. Abraham ² nempea se Ishak, Ishak nempea se Yakub, Yakub nempea se Yehuda ai erai buntung-erai buntung yo, ³Yehuda nempea se Peres ai Zerah ngket Tamar, Peres nempea se Hezron, Hezron nempea se Ram, ⁴Ram nempea se Aminadab, Aminadab nempea se Nahason, Nahason nempea se Salmon, ⁵Salmon nempea se Boas ngket Rahab, Boas nempea se Obed ngket Rut, Obed nempea se Isai, ⁶Isai nempea se raja Daud. Daud nempea Salomo ngket bawe Uria, ⁷Salomo nempea se Rehabeam, Rehabeam nempea se Abia, Abia nempea se Asa, ⁸Asa nempea se Yosafat, Yosafat nempea se Yoram, Yoram nempea se Uzias, ⁹Uzias nempea se Yotam, Yotam nempea se Ahas, Ahas nempea se Hizkia, ¹⁰Hizkia nempea se Manasye, Manasye nempea se Amon, Amon nempea se Yosia, ¹¹Yosia nempea se Yekhonya ai erai buntung-erai buntung yo des olo nte noding epo Babel. ¹²Sundok noding epo Babel, Yekhonya nempea se Sealtiel, Sealtiel nempea se Zerubabel, ¹³Zerubabel nempea se Abihud, Abihud nempea se Elyakim, Elyakim nempea se Azor, ¹⁴Azor nempea se Zadok, Zadok nempea se Akhim, Akhim nempea se Eliud, ¹⁵Eliud nempea se Eleazar, Eleazar nempea se Matan, Matan nempea se ¹⁶Yakub, Yakub nempea se Yusuf song Maria, io ngmekus Yesus yo nulek Kristus. ¹⁷Eka-eka yo keo: opat belas kturunan ngket Abraham sampe Daud, opat belas kturunan ngket Daud sampe jman nte noding epo Babel, diang opat belas kturunan ngket jman nte noding epo Babel sampe Kristus. ¹⁸Yesus Kristus ene kino mekus ktindo: Des jman Maria, ine-Iyo, sundok nanu nte kawen diang Yusuf, skali yo io klandung ngket Roh Kudus, onon se dero bolum besong bawe. ¹⁹Koe Yusuf song yo, ulun yo buen kno ai belo kakan ngmai karan bawe yo mbo onon ulun deo, io keo ptua lang kno kakan ngendikah diang suni-suni. ²⁰Tapi des io ngnanam nau ptua ene, mlekat Tuhan melak epo io lang nupi ai ngulek: "Yusuf, pea Daud, nang ka iko gaer nembawe Maria nte ko bawe, koe pea lang buntung yo ene ngket Roh Kudus. ²¹Io anta ngmekus pea song ai iko anta nampa karan Io Yesus, koe Io dko yo nte nylamat umat-Iyo ngket dosa dero." ²²Nau umbang ene jadi apa gnenap firman Tuhan tete nabi: ²³Sbeta yo, pea ngelok ene anta kbuntung ai ngmekus pea song ai dero anta nampa karan Io Imanuel" yo ene: Allah diang taka. ²⁴Sundok io uat ngket turui, Yusuf nglaku kati yo ptua mlekat Tuhan ene epo io. Io ngalek Maria jadi bawe io, ²⁵tapi belo kerai turui diang io sampe io ngmekus pea yo song ai Yusuf nampa karan Io Yesus.

Chapter 2

¹Sundok Yesus kinomekus ela Betlehem ela tana Yudea des jaman raja Herodes, ulet doko ulun-ulun majus ket timur epo Yerusalem ²ai rkunti: "Ela mone Iyo, raja ulun Yahudi yo bayu kinomekus ene? Kain sundok kito bintang-Iyo ela timur ai kain ulet nte nyembah Iyo." ³Des raja Herodes kringo ene tkojet io diang pupus Yerusalem. ⁴Koe ene iyo ngumpul eka imam pnguntok diang ahli Taurat bangsa Yahudi, iyo tindu lako ulek dero, ela mone Mesias ene anta kinomekus. ⁵Dero ngulek epo iyo: "Ela Betlehem mbo tana Yudea, koe keo tnulis lang kitab nabi: ⁶Ai iko Betlehem, tana Yehuda, iko makse yo paling idik mbo ekang dero yo mrenta Yehuda, koe ket iko se anta nyuli erai kongo pngutok, yo nte mimpin umat-Ku Israel." ⁷Laju diang suni-suni Herodes momba ulun-ulun majus ene ai diang titip buntit ngunti epo dero, des mone bintang ene melak. ⁸Bayu iyo nyuyu dero epo Betlehem, ulek iyo: "Malan ai sinolidik beta-beta nau umbang Pea ene peles sundok ikam ruku Iyo, bnere epo aku apa aku ulet low epo nyembah Iyo." ⁹Sundok kringo pnyurah raja ene, laju malan dero. Eti ka, bintang yo eti dero tadah timur ene keo mbo onon dero malan sampe ulet ai brenti mbo awa, yo montuk diang awa Pea ene keo. ¹⁰Des dero kito bintang ene, ego beta dero. ¹¹Sumba dero epo lang lou ene ai kito Pea ene diang Maria, ine-Iyo, laju sujud nyembah Iyo. Peles dero ngingkang awa kakas plean dero laju mie persembahan epo Iyo, yo doko mas, kmenyan ai mur. ¹²Koe sundok pinoknop lang nupi, apa belo mulik epo Herodes, dero uli epo ja dero tete boyan yo mak. ¹³Des ulun-ulun majus ene brangkat, melak doko mlekat Tuhan epo Yusuf lang nupi diang ngulek: "Uat aut, alek Pea ene diang ine-Iyo, buyo epo Mesir diang nongos mbo mne sampe Aku berfirman epo iko, koe Herodes anta meto Pea ene nte ngempate Iyo." ¹⁴Uat doko Yusuf, alek iyo Pea diang ine-Iyo malom ene low, laju makat epo Mesir, ¹⁵nongos mbo lane sampe Herodes mate. Nau ene apa gnenap firman Tuhan tete nabi: "Ket Mesir Aku momba Pea-Ku." Des Herodes tau, se io akal ulun-ulun majus ene, io mara beta. Io nyuyu ngempate eka bang pea ela Betlehem diang lekum naine, yo ene bang pea yo umur duo taun epo iwa, sengkono diang des yo pentau iyo ket ulun-ulun majus ene. ¹⁷Diang ktine gnenap lou firman yo sname koe nabi Yeremia: ¹⁸"Keo oyon mbo Rama, tangis tungul yo luway beta; Rahel ngnangis pea-pea iyo, ai io belo kakan sinompaye, koe dero belo keo oli." ¹⁹Des Herodes mate, melak doko mlekat Tuhan epo Yusuf lang nupi mbo Mesir, ulek iyo: ²⁰"Uat iko, alek Pea ene diang ine-Iyo trus brangkat epo tana Israel, koe dero yo kakan ngempate Pea ene, sundok mate." ²¹Laju Yusuf uat, alek yo Pea ene diang ine-Iyo laju malan epo tana Israel. ²²Tapi des iyo kringo, se Arkhelaus jadi raja ela Yudea ngganti Herodes, uma iyo, io takut epo lane. Koe nsehat lang nupi, brangkat doko Yusuf epo Galilea. ²³Des ulet ela lane io nongos mbo kota nan karan se Nasaret. Nau ktine ene apa gnenap firman Tuhan yo sname koe nabi-nabi, se Io ene anta nulek: Ulun Nasaret.

Chapter 3

¹Des ene nyoret Yohanes Pembaptis mbo padang gurun Yudea ai nyampe: ²"Tobat aut, koe Krajaan Allah sundok dempet!"

³Sebeta yo iyo ene doko yo kno nabi Yesaya des io ngulek: "Keo oyon ulun nengou-nengou mbo padang gurun: Nraduh ta boyan nte Tuhan, pinolonus ta boyan nte- Iyo." ⁴Yohanes makai jubah bulu onta ai ktinggang upak, ai okan singkap iyo upan ai tita wani. ⁵Jadi ulet doko epo iyo ulun yo nongos mbo Yerusalem, ngket pupus Yudea ai ngket pupus denia lekum Yordan. ⁶Trus ulak ngaku dosa iyo dero bnaptis koe Yohanes mbo atang Yordan. ⁷Tapi des io kito deo ulun farisi ai ulun Saduki ulet nte baptis, io ngulek epo dero: "Ikam yo upus nipo muro. Ise yo ngulek epo ikam, se ikam kuli bjyo ngket mara roa yo anta ulet?" ⁸Jadi arus ngasil bua yo sengkono diang tobat. ⁹Ai nang ngomoy, se ikam kuli ngulek lang kesong kam: Abraham ene bapa kain! Koe aku ngulek epo ikam: Allah kuli nampa pea-pea nte Abraham ngket batu-batu endo! ¹⁰London sundok keo mbo tondal kayu ai tongku kayu yo belo di ngasil bua yo buen, pasti tnotou ai noding epo lang api. ¹¹Aku ngebaptis ikam diang danum nte tanda tobat, tapi io ulet sori se aku pawak olay kuasa se aku ai aku belo di snaron nte ngosu trumpak-Iyo. Io anta ngebaptis ikam diang Roh Kudus ai diang api. ¹²Kakas pniaw sundok mbo kayang-Iyo. Io anta ngembrese awa penggiling-Iyo ai ngumpul gandong-Iyo epo lang slipir, tapi dasa uyam ene anta tuna-Iyo lang api yo belo dapet plonsop. ¹³Jadi ulet doko Yesus ngket Galilea epo Yordan epo Yohanes nte iyo baptis. ¹⁴Tapi Yohanes ng usan Iyo, ulek io: "Aku doko yo perlu baptis-Ko, ai Iko yo ulet epo aku?" ¹⁵Trus Yesus nuing, Ulek-Iyo epo iyo: "Koe ka nau ene terjadi, koe ktine doko moko yo taka bgenap eka ptua Allah." Ai Yohanes lou ngaya nte Iyo. ¹⁶Sundok bnaptis, Yesus peles baling ngket lang danum ai des ene lou langit wingkang ai Io kito Roh Allah kati mpulu dara diwa epo ombon Iyo, ¹⁷trus taro dingo doko oyon ngket sorga yo ngulek: "Endo doko Pea-Ku yo tengkosang-Ku, epo Iyo bute Aku sengkono kesong."

Chapter 4

¹Des Yesus oit Roh epo padang gurun nte uwok soba. ²Ai sundok puasa opat pulu olo opat pulu malom, pnyundok-iyo Yesus kiso se siet lauw. ³Laju ulet doko tukang nyoba ai ngulek epo-Iyo: Ena beta Iko Pea Allah, suyu kotah apa batu-batu endo jadi jaja." ⁴Tapi Yesus nuwing: "Sundok keo tnulis: Ulun belo di bolum ja-ja tingen, tapi ngket tongku firman io baling ngket bouwa Allah." ⁵Sundok ene uwok moit-Iyo epo Kota Susi ai mayak-Iyo epo ban bungan Bait Allah, ⁶laju ngulek epo-Iyo: "Ena beta Iko Pea Allah, platu Ko tah kompu Ko epo iwa, koe keo tnulis: Nau umbang Ko, Io njmmuyu mlekat-mlekat-Iyo ai dero anta nampen Iko ban kayang dero, apa botis Ko belo mngku epo batu." ⁷Ulek Yesus epo io: "Keo low tnulis: Nang iko nyoba Tuhan Allah ko!" ⁸Ai uwok ene nua moyit-Iyo epo usuk tunden yo ombo beta ai mmkelak epo-Iyo eka krajaan mbo dnnia endo diang kbuen-iyo, ⁹ai ngulek epo-Iyo: "Eka-eka ene anta die ku epo Iko, ena Iko nyongkop nymbah aku." ¹⁰Des ene Yesus ngulek epo-iyo: "Makat iko, uwok! Koe keo tnulis: Iko ene arus nymbah Tuhan, Allah ko, ai pulun epo-Iyo bute iko ngaya. ¹¹Laju uwok ene ngndikah-Iyo, ai eti ka doko mlekat-mlekat ene ulet epo nyndro Yesus. ¹²Tapi des Yesus kringo se Yohanes sundok tnangop, Io ngliki epo Galilea. ¹³Io ngndikah Nasaret epo nongos mbo Kapernaum, ela isan gntung, mbo kampong Zebulon ai Naftali, ¹⁴apa gnnap firman yo snampe koe Nabi Yesaya: ¹⁵"Tana Zebulon ai tana Naftali, boyan epo tadah tasik, kampong ela mpai atang Yordan, Galilea, tana bangsa-bangsa yo mak, ¹⁶ bangsa yo nongos mbo lang seom, sundok kito walla yo olai ai nte dero yo nongos mbo dnnia yo bslingu diang pngmate, sundok ulet wala," ¹⁷Mulai ngket ene Yesus ngulek: "Betobat ikam, koe Kerajaan Sorga sundok dmpet!" ¹⁸Des Yesus desung malan nyarak isan gntung Galilea, Io kito duo kongo ulun erai buntung, yo ene Simon nulek se Petrus, ai Andreas, okong-iyo. Dero desung ngnjala mbo gntung, koe dero tukang ngnjala esa. ¹⁹Yesus ngulek epo dero: "Dido, nyarak Aku, ai ikam anta tampa-Ku jadi pngnjala ulun." ²⁰Trus dero oli des ene se nape jala ene ai lumpat diang Io. ²¹Ai sundok Yesus malan ngket lane, Io kito nuwa keo duwo kongo ulun erai buntung, yo ene Yokobus pea Zebedeus ai Yohannis erai buntung-iyo diang uma dero, Zebedeus, desung nngkuen jala dero mbo lang praw. Yesus momba dero ²² ai dero des ene se ngnddikah praw diang uma dero, trus njarak Io. ²³Yesus nua nglekum mbo pupus Galilea; Io nutui matuk lang lou-lou smbayang ai ngesah soal Injil Krajaan Allah diang mkale eka roton ai nau numbang gramas mbo ekang bangsa ene. ²⁴des sampe kabar nau umbang-iyo mbo Siria ai noit doko epo-Iyo eka ulun yo triaw pnymbolum-iyo, diang ssa, bjnnis karan roton ai bnasa, diang snumban, diang roton ngmbekat ai pokung, trus Yesus mkale dero. ²⁵Des ene ulun ngldoyun nyarak-Iyo. Dero ulet ngket Galilea ai ngket Dekapolis, ngket- Yerusalem ai ngket Yudea ai ngket mpai Yordan.

Chapter 5

¹Des Yesus kito ulun deo ene, Io dombo epo ban tunden ai des Io tunge, ulet doko murid-murid-Iyo ngompoh-Iyo. ²Jadi mulai doko Yesus bsara ai nutui matuk dero, ulek-Iyo: ³"Ego beta doko ulun yo kao mbo onon Allah, koe dero ene yo ngmpun Krajaan Sorga. ⁴Ego beta doko ulun yo pngnanam luai, koe dero anta sinompae. ⁵Ego beta doko ulun yo belo di kois koroi, koe dero anta ngmpun dnia. ⁶Ego beta doko ulun yo slau ai krengan se yo beta, koe dero anta tinompas. ⁷Ego beta doko ulun yo sawai, koe dero anta kono ksawai. ⁸Ego beta doko ulun yo brse kesong-iyo, koe dero anta kito Allah. ⁹Ego beta doko ulun yo moit damai, koe dero anta nulek pea-pea Allah. ¹⁰Ego beta doko ulun yo knurow knsa koe yo beta, koe dero doko yo ngmpun Krajaan Sorga. ¹¹Ego beta doko ikam, ena koe Aku ikam pinosala ai knurow knsa ai epo ikam pinotnah eka yo triaw. ¹²Snang ai ego ka, koe upa kam olai mbo sorga, koe ktine low sundok knurow knsa nabi-nabi yo onon se ikam." ¹³"Ikam ene garam dnia. Ena garam ene jadi tawai, diang ise io kinomasin? Belo keo oli jodo-iyo makse noding ai toda ulun. ¹⁴Ikam ene trang dnia. Kota yo ban tunden belo anta di melim. ¹⁵Ktine low ulun belo di neket plita laju mayak-iyo la iwat kepit, tapi mbo ban blai plita apa mtrang nte eka-eka ulun mbo lang lou ene. ¹⁶Ktine doko moko-iyo trang ko ene kuwala mbo onon ulun, apa dero kito gawi gata ko yo buen ai ngmulia Bapa-ko yo mbo sorga." ¹⁷Nang ka ikam ngomoi, se Aku ulet nte nembelo aturan Taurat ktine low kitab nabi-nabi. Aku ulet makse di nte nembelo-iyo, tapi

nte mgnap-iyu.¹⁸Jadi Aku ngulek epo ikam: Se beta-beta-iyu kola-kola belo pian mapos langit ai dnia endo, ndok erai urup ketine lou erai titik belo anta tinombelo ngket aturan Taurat onon eka-eka ene trjadi.¹⁹Koe ene ise-ise ulun yo nembelo erai bute ka ngket prenta aturan Taurat tontan yo paling idi, ai nutui matuk-iyu ktine epo ulun yo mak, io anta tunge mbo awa yo iwa tingen mbo lang Krajaan Sorga; tapi ise-ise ulun yo nglaku ai nutui matuk eka prenta-prenta aturan Taurat, io anta tunge mbo awa yo ombo mbo lang Krajaan Sorga.²⁰Koe ktine Aku ngulek epo ikam: Ena bolum keo agama kam belo di kono aso se bolum keo agama ahli-ahli Taurat ai ulun-ulun Farisi, se beta-beta-iyu ikam belo anta sumba epo lang Krajaan Sorga.²¹Ikam sundok kringo firman yo snampe epo itak kakah taka: Nang ngmpate; ise-ise ulun yo ngmpate arus nukum.²²Tapi Aku ngulek epo ikam: Tongku-tongku ulun yo mara roa balo epo eraibuntung-iyu arus nukum; ise-ise ulun yo ngulek epo eraibuntung-iyu: Kaper! arus nadap epo Mahkamah Agama ai ise-ise ulun yo ngulek: golu! arus snrah epo lang nraka yo dolan nyelop-nyelop.²³Koe ene, ena iko mie persmbahan-ko ban mezbah ai iko taro kno se yo keo lang kesong eraibuntung-ko epo iko,²⁴tape ka persmbahan-ko mbo onon mezbah ene ai malan nte bdamai ile diang eraibuntung-ko, bayu mulik nte mie persmbahan-ko ene.²⁵Resi-resi bdamai diang bali-ko nyndipot iko aso sama-sama diang io mbo boyan, apa bali-ko ene nang nyrah iko epo hakim ai hakim ene nyrah iko epo Plisi ai iko pinosumba epo lang sper.²⁶Aku ngulek epo iko: Se beta-beta-iyu iko belo anta baling ngket lane, ena utang-ko belo pian bnayar eka.²⁷Ikam sundok kringo firman: Nang bjinah.²⁸Tapi Aku ngulek epo ikam: Tongku-tongku ulun yo meti bawe ulak kakan balo se-iyu, sundok bjinah diang io mbo lang kesong-iyu.²⁹Jadi ena mato-ko yo sanan mktang iko, snungkit skali ai noding, koe buen ube nte ngko ena erai ngket bagian kompu-ko belo keo, se kompu-ko goluh noding epo lang nraka.³⁰Jadi ena tangan sanan-ko mktang iko, tnotok ka ai oding ka ene, koe buen ube nte ngko ena erai ngket bagian kompu-ko belo keo, se kompu-ko goluh sumba nraka.³¹Sundok snampe low firman: Ise-ise ulun yo nytuar bawe-iyu arus mie surat stuar epo-iyu.³²Tapi Aku ngulek epo ikam: Tongku-tongku ulun yo nytuar bawe-iyu yo makse koe jinah, io nampa bawe-iyu bjinah; ai ise-ise ulun yo kawen diang bawe yo sinotuar, gawi io ene jinah.³³Ikam sundok kringo low firman yo sundok snampe epo itak kakah taka, nang bsumpah eta-eta, tapi sumpah ene arus negop onon Tuhan.³⁴Tapi Aku ngulek epo ikam: Nang beta bsumpah tontan sindai bute, tontan diang langit, koe langit ene awa takhta Allah,³⁵ktine low pakai diang dnia, koe dnia ene awa pnoda botis-iyu, ktine low pakai diang Yerusalem, koe Yerusalem ene kota Raja Olai,³⁶nang beta low bsumpah pakai diang utok ko se, koe iko belo di keo kuasa nte nmbura ai nmbuyung endok erai buti balo.³⁷Ena oo, arus beta ikam ngulek: oo, ena belo, arus beta ikam ngulek: belo. Ise yo sisa se ene ulet ngket yo triaw.³⁸Ikam sundok kringo firman: Mato ganti mato ai kukut ganti kukut.³⁹Tapi Aku ngulek epo ikam: Nang beta ikam nglawan ulun yo triaw gawi epo ikam, tapi ise-ise ulun yo nampar pasik sanan-kam, die ka low epo-iyu pasik sei-kam.⁴⁰Ai epo ulun yo kakan ngadu iko koe nngkakan baju-ko, srah ka low jubah-ko.⁴¹Ai ise-ise ulun ka yo maksa iko malan koro erai mil, dalan ka diang io koro duo mil.⁴²Dnie beta epo ulun yo tindu epo iko ai nang nolak ulun yo kakan ngingjam ngket iko.⁴³Ikam sundok kringo firman: Tinongkosang beta sama-sama ulun kam ai knekoi beta bali kam.⁴⁴Tapi Aku ngulek epo ikam: Tinongkosang beta bali kam ai bdoa beta nte dero yo ngurow ngsa ikam.⁴⁵Koe diang ktine doko ikam jadi pea-pea Bapa-kam yo mbo sorga, yo mtimbul mato olo nte ulun yo dat ai nte ulun yo buen ai mdiwa uran nte ulun yo kono ai nte ulun yo belo keo yo kono.v 46 Ena ikam nngkosang ulun yo nngkosang ikam, ise upa kam? Belo be pnage be low nggawi ktine? ⁴⁷Jadi ena ikam pulun mie salam epo eraibuntung-eraibuntung kam tingen, ise lngkat-iyu se gawi ulun yo mak? Belo be ulun yo belo tau se Allah low keo gawi ktine? ⁴⁸Koe ene arus beta ikam belo keo bilamolon,sama kati Bapa-kam yo mbo sorga ene belo keo bilamolon."

Chapter 6

¹Knop beta-beta, nang iko nglaku aturan agama ko onon ulun apa eti dero, koe ena ktine, iko belo di kuli upa ngket Bapa-ko yo mbo sorga.²Jadi ena iko mie die sokoi nang iko ngesah epo ulun nau ene, kati yo gawi ulun yo gawal btondek tingen lang lou-lou smbayang ai mbo boyan-boyana alus, apa dero pkolai ulun. Aku ngulek epo iko: Beta-beta yo dero sundok kuli upa-iyu.³Tapi ena iko mie die sokoi, mba di koyoh tau tangan sei-ko ise gawi tangan sanan-ko. ⁴Arus yo die sokoi-ko ene dne diang melim, jadi Bapa-ko yo kito yo melim anta males-iyu epo iko.⁵Ai ena ikam bdoa, nang beta bdoa kati yo gawi ulun yo btondek tingen. Dero gawal ngontai doa dero diang akat lang lou-lou smbayang ai mbo tikungan-tikungan boyan, apa dero eti ulun. Aku ngulek epo ikam: Beta-beta yo dero sundok kuli upa-iyu.⁶Tapi ena iko bdoa, sumba epo lang kamar-ko, tnokom jawong ai bayu bdoa epo Bapa-ko yo keo mbo awa yo melim. Jadi Bapa-ko yo kito yo melim anta males-iyu epo iko. ⁷Aso nua lang doa-ko ene nang beta iko anyal balo kati pnepet ulun yo belo tau se Allah. Dero ngomoi se koe deo pmnsara doa dero anta tinompaning.⁸Jadi nang beta ikam kati dero, koe Bapa kam tau ise yo prlu kam, onon ikam tindu epo-iyu.⁹Koe ene bdoa doko ktindo: Bapa kain yo mbo sorga, Pinokudus beta karan-Ko, ¹⁰ulet beta Krajaan-Ko, jadi beta ptua-Ko mbo dnia kati mbo sorga.¹¹Die beta kain olo endo okan singkap yo puli ¹²ai ampun beta kain diang sala-sala kain, kati kain low ngampun ulun yo keo sala epo kain; ¹³ai nang beta moit kain nte soba, tapi awat beta kain ngket yo triaw. (Koe lko doko yo mpun Krajaan ai kuasa ai kmulia sampe turai-turai-iyu. Amin.)¹⁴Koe ena ikam ngampun sala ulun, Bapa kam yo mbo sorga anta ngampun ikam low.¹⁵Tapi ena ikam belo ngampun ulun, Bapa kam low belo anta ngampun sala kam.¹⁶Ai ena ikam puasa, nang beta nruwow nau wae kam kati yo gawi ulun yo gawal btondek tingen. Dero ngensut saya wae dero, apa ulun kito se dero desung puasa. Aku ngulek epo ikam: Se beta-beta yo dero sundok kuli upa-iyu.¹⁷Tapi ena iko puasa, nlnga utok-ko ai snempuy wae-ko, ¹⁸apa nang itan ulun se iko desung puasa, tapi Bapa-ko tingen yo keo mbo awa yo melim. Jadi Bapa-ko yo kito yo melim anta males-iyu epo iko.¹⁹Nang beta ikam nmbun pengkeo mbo dnia; mbo

dnia ggat ai daki ngrusak-iyu ai pngako ngugah ai ngako-iyu. ²⁰Tapi tmbun beta nte ngkam pengkeo mbo sorga; mbo sorga gegat ai daki belo di ngrusak-iyu ai pngako belo di ngugah diang ngako-iyu. ²¹Koe mbo mone pengkeo ko keo, mbo mne low kesong-ko keo. ²²Mato ene plita kompu. Ena mato-ko buen pa doko mupus kompu-ko; ²³ena mato-ko dat, seom ka doko mupus kompu-ko. Jadi ena pa yo keo mbo iko lensop, seom ene jadi seom ji. ²⁴Ndok belo erai kongo ulun kuli bgawi nte dua tuan. Koe ena ktine, io anta kekoi se yo erai kongo ai nngkosang yo mak, ktine low io anta stia epo yo erai kongo ai belo ngaya nte yo mak. Ikam belo kuli bgawi nte Allah ai nte Mamon. ²⁵"Koe ene Aku ngulek epo ikam: Nang ka water nau bolum-kam, anta ise nte ngkam okan ai isop, ai nang ka water low nte kompu-kam, anta ise nte ngkam pakai. Belo be bolum ene pawak pnting se kuman ai kompu ene pawak pnting se pakaian? ²⁶Eti ka mpulu-mpulu ombon taka, yo belo di skulo ai belo di ngutik asil ai belo di ngona nguyu lang longkong, tapi pakan Bapa-kam yo mbo sorga. Mba be ikam ene pawak ombo se mpulu-mpulu ene? ²⁷Ise ikam yo koe water-iyu kuli nambah budah tundok siku nau bolum-iyu? ²⁸Ai ise moko ikam water se pakaian? Eti ka bungo bakung mbo umo, yo tumbu ulak belo bgawi ai belo pan ngndalin, ²⁹tapi Aku ngulek epo ikam: Salomo lang eka khebat-iyu belo pini spakai kbuen bungo bakung ene. ³⁰Jadi ena ktine Allah ngraji dikut mbo umo, yo olo ndo keo ai manin noding epo lang api, belo be Io anta aso pawak ngraji ikam, o ulun-ulun yo kurang prsaya? ³¹Koe ene nang ka ikam water ai ngulek: Ise yo anta nte kain okan? Ise yo anta nte kain isop? Ise yo anta nte kain pakai? ³²Eka ene eto bangsa-bangsa yo belo tau se Allah. Tapi Bapa-kam yo mbo sorga tau, se ikam prlu eka-eka ene. ³³Tapi eto ile Krajaan Allah ai yo beta ngket-Iyu, jadi eka-eka ene annta tnambah nte ngkam. ³⁴Koe ene nang beta ikam water nte olo manin, koe olo manin keo ksusah-iyu se. Ksusah erai olo sukup ka nte erai olo."

Chapter 7

¹"Nang iko mutus, apa iko belo di pnutus. ²Koe diang pmutus yo pakai ko nte mutus, iko anta pnutus ai pnyukat yo pakai ko nte nyukat, anta snukat epo iko. ³Ise moko iko meti uras alus lang mato erai buntung ko, pdahal plong kayu lang mato ko se iko belo tau? ⁴Timbe nau ko kate ngulek diang erai buntung ko: Koe ka aku nembaling uras alus ngket lang mato ko, pdahal keo plong kayu lang mato ko se. ⁵O ulun yo btondek tingin, tinombaling ile plong kayu lang mato ko, apa iko kate meti diang jlus nte nembaling uras alus lang mato erai buntung ko. ⁶"Nang iko mie kakas yo kudus nte koko ai nang iko nurak mutiara ko nte bawi, apa nang kanja iyo, bayu io mulik nte mrinsit iko. ⁷"Tnindu, pasti dne epo iko; neto, pasti iko kuli; knetok, pasti jawong ningkan nte ngko. ⁸Koe tongku ulun yo tindu, nrima ai tongku ulun yo meto, kuli ai tongku ulun yo ngetok, jawong ningkan nte iyo. ⁹Keo be lelu ikam yo mie batu nte pea iyo, ena io tindu jaja, ¹⁰mie nipo, ena tindu esa? ¹¹Jadi ena iko yo dat ka tau pendie yo buen nte pea-pea ko, nyait da Bapa ko ela sorga! Io anta mie yo buen nte dero yo tindu diang Iyo. ¹²"Ise pengkakan ko apa ulun nggawi nte ko, tampa ktine low epo dero. Ene nau umbang atok eka-eka ukum Taurat diang kitab nabi-nabi. ¹³Sumba ta ngket jawong yo sidet ene, koe sae jawong ai lega boyan yo tadah epo bnasa, ai deo ulun yo lalo ngket ne; ¹⁴Koe sidet jawong ai boyan idik yo tadah epo pnyembolum, ai kurang ulun yo kuli. ¹⁵"Jaga-jaga diang nabi-nabi plesu yo ulet ngruku iko yo memenau kati domba, sebata yo dero ene sengkalau yo prenges. ¹⁶Ngket bua yo doko ikam anta tau se dero. Kuli be ulun ngupei bua anggur ngket jaba dui ktine low bua ara ngket dikut kdui? ¹⁷Ktine low tongku tonga kayu yo buen ngasil bua yo buen, tonga kayu yo dat ngasil bua yo dat low. ¹⁸Belo anta tonga kayu yo buen ngasil bua yo dat, ktine low tonga kayu yo dat belo anta ngasil bua yo buen. ¹⁹Ai tongku tonga kayu yo belo ngasil bua yo buen, pasti tnotow ai noding epo lang api. ²⁰Jadi ngket bua yo doko ikam anta tau se dero. ²¹Belo di tongku ulun yo momba Aku: Tuhan, Tuhan! anta sumba lang Krajaan Sorga, tapi yo nglaku ise yo ptua Bapa-Ku ela Sorga. ²²Des olo pngabis deo ulun yo momba Aku: Tuhan, Tuhan, Belo be kain sundok ngulek yo anta terjadi makai karan-Ko ai ngusa uok makai karan Ko, ai mkeyo deo tanda ajaib diang makai karan Ko low? ²³Des ene low aku trus trang epo dero ai ngulek: Aku belo pini tau se ikam! Buyo ngket Aku, ikam eka-eka yo nampa dat! ²⁴"Tongku ulun yo nempaning pemesara-Ku endo ai nggawi yo, io sama diang ulun yo bijaksana, yo nengkuat lou iyo ombon batu. ²⁵Laju diwa uran diang owa, ai brubu mitek lou ene, tapi lou ene belo di mokombe koe tnengkuat ombon batu. ²⁶Tapi tongku ulun yo kringo pemesara-Ku endo ai belo nggawi iyo, io sama diang ulun bungang, yo nengkuat lou iyo ban krisik. ²⁷Laju diwa uran diang ulet owa, ai brubu yo kono lou ene, jadi roros lou ene ai meroa rusak yo. ²⁸Des Yesus sundok ngesah ene, eran ngrengao ulun deo ene kringo tutui batuk-Iyo, ²⁹Koe Iyo nutui batuk dero kati ulun yo keo kuasa, belo di kati ahli-ahli Taurat dero.

Chapter 8

¹Sundok Yesus diwa ngket tunden, ulun deo ngelenduyun nyarak Io. ²Ulet erai kongo ulun yo roton kodong epo-Iyo, laju nyongkop nymbah Io ai ngulek: "Tuan, Ena Tuan kakan, Tuan kuli mkale aku." ³Yesus nyokoi kayang-Iyo, mulem ulun ene ai ngulek: "Aku kakan, Ale ka iko." Des ene peles ulun ene ale ngket roton kodong io ene. ⁴Sundok ene Yesus ngulek epon iyo: "Knop-knop iko, nang iko ngesah nau umbang endo epo ulun mak, tapi pkelak ko kompu tonga ko epo imam ai die ko prsmbahan kati yo snuyu koe Musa, nte bukti epo dero." ⁵Des Yesus sumba mbo Kapernaum, ulet erai kongo kmndan tntara nyruku Io ai tindu awat epo-Iyo: ⁶"Tuan, batak ku bgaleng ela lou koe roton pokung ai io ene ssa beta." ⁷Yesus ngulek epo iyo: "Aku nindo daro mkale iyo." ⁸Tapi tuing kmndan tntara ene epo-Iyo: "Tuan, Aku belo snaron nrima Tuan lang lou ku, ontus Ko ka erai buku pmnsara, jadi batak ku ene pasti ale. ⁹koe aku endo anak bua lou, ela iwat ku aso keo tntara yo pangkat io imbat aku. ena aku ngulek epo tntara yo pangkat io imbat aku ene: diduh iko!, io laju daro, diang epo yo mak aku ngulek: pondo iko!, Io ulet peles, ktine low epo batak ku aku ngulek: gawi ko endo! gnawi koe iyo." ¹⁰Sundok

Yesus kringo otang ene, Io eran laju ngulek epo dero yo lumpat-Iyo: "Aku ngulek epo ikam, beta-beta yo ka, iman kolai endo belo Aku pini ruku mbo lang erai kongoulun Israel.¹¹ Aku ngulek epo ikam: Deoulun nindo ulet ngket timur ai barat ai tunge kuman kerai diang Abraham, Ishak diang Yakub mbo lang Krajaan Sorga,¹² tapi anak-anak Krajaan ene ube noding epo lang awa yo seom ji, lane nindo keo ruku tangis diang rgigep kukut." ¹³Yesus ngulek epo kmndan tntara ene: "Uli ka iko, jadi ka mbo iko kati yo iko prsaya." Des ene pelesulun batak yo ene ale.¹⁴ Des dero sampe mbo lou Petrus, Yesus kito se ampu Petrus yo bawe bgaleng koe mekom. ¹⁵Io ngop tanganulun bawe ene, laju ale peles mekom yo ene. io uat laju nglayan-Iyo.¹⁶ Desung dnia ilang ilot deoulun moit epo Yesusulun yo snumban uwok, diang erai buku pmsara Yesus ngusa roh-roh ene diang mkaleulun-ulun yo sesa koe roton. ¹⁷Umbang ene trjadi apa gnappirman yo snampe koe nabi Yesaya: "Io ene nindo yo nantai siet smoleng taka ai mkale roton san taka."¹⁸ Des Yesus kito se deoulun nglekum-Iyo, Io nyuyu btual epo mpai. ¹⁹Ulet apo erai kongo ahli torat laju ngulek epo-Iyo: "Guru, aku kakan lumpat Iko, epo mombe-mombe ka Iko bju." ²⁰Yesus ngulek epo iyo: "Sngkalaw ene keo liang ai mpulu keo salai, tapi Pea Ulun belo keo awa nte awa mayak utok-Iyo."²¹ Keoulun yo mak, erai kongo ngket murit-Iyo, ngulek epo-Iyo: "Tuhan, kate be aku malan ile nte nglowong uma ku." ²²Tapi Yesus ngulek epo iyo: "Lumpat Aku ka iko, koe kaulun-ulun mate nglowongulun-ulun dero yo mate."²³ Sundok ene Yesus dombo epo lang praw diang murit-murit-Iyo lumpat-Iyo low. ²⁴Kolan-kolan ka se bruburies mbo gntung sae ene, sampe praw dero ene tulung umbak, tapi Yesus desung turui. ²⁵Murit-murit-Iyo ngenduko Io, Ulek dero: "Tuhan, awat endo, taka sesa."²⁶ Io ngulek epo dero: "Ise moko ikam takut, ikam yo kurang prsaya?" Sundok ene Yesus uat laju nmpnger riut diang umbak ene, ngket ene riut diang umbak mbo gntung ene tno beta. ²⁷Ulun-ulun mne eran, ulek dero: "Ise jnis Ulun endo, moko panan riut ai gntung ngaya ba nte-Iyo?"²⁸ Des dero sampe mbo mpai, yo ene mbo dnialulun Gadara, ulet ngket tadah kubur duo kongoulun yo snumban uwok ngruku se Yesus. Dero ene prnges beta, koe ene ndok belo eraiulun keo ronulalo mbo boyan mne. ²⁹Dero nyoyar, ulek dero: "Ise urusan-Ko diang kain, O Pea Allah? Bahe Iko epo dido nte mssa kain onon se ampe des yo?"³⁰ Belo di oroh ngket awa dero mne keo jut kawan bawi desung meto nte okan. ³¹Setan-setan ene tindu epo-Iyo, ulek dero: "Ena Iko ngusa kain, suyu-Ko ka kain wensut epo lang kompu jut kawan bawi enduh." ³²Yesus ngulek epo dero: "Daro ka ikam!" sundok ene dero baling laju sumba epo lang kompu bawi-bawi ene. ngket ene bawi-bawi ene sntuyun ngket krbing epo lang gntung laju mate lian monsor.³³ Ulun-ulun yo ngnjaga bawi ene buyo, sampe dero mbo kota, dero ngesah nau umbang ene, ktine low nau umbangulun-ulun yo snumban setan ene. ³⁴Ulun-ulun erai kota baling nyuruku se Yesus, des dero ruku se Io, dero maksa apa Io oroh ngket dnial dero mne.

Chapter 9

¹Sundok ene dombo ka Yesus epo lang praw laju kentas. Trus sampe doko Io mbo kota-Iyo se. ²Jadi oitulun ka doko epo-Iyo erai kongoulun yo belo klian malan koe pokung yo bgaleng ban awa pnurui-iy. Des Yesus kito iman dero, ngulek ka doko Io epoulun pokung ene: "Persaya beta ka, o pea-Ku, dosa-ko sundok nampun."³ Jadi ngulek ka doko tenu-tenu kongo ahli-ahli Taurat lang kesong dero: "Io nguja Allah."⁴ Tapi Yesus tau kno dero, laju ngulek: "Ise moko ikam ngnanam yo triaw mbo lang kesong-kam? ⁵Ise llu yo paling sepel beta nte ulek: Dosa-ko sundok nampun, ena belo ngulek: Uat ka ai malan ka? ⁶Tapi apa ikam tau, se mbo dnial endo Pea Ulun keo kuasa nte ngampun dosa" - laju Io ngulek epoulun pokung ene - : "Uat ka ai engkat awa pnurui-ko ai uli ka epo lou-ko!"⁷ Ai uat ka dokoulun ene laju uli.⁸ Jadiulun deo yo kito nau ene takut laju ngmulia Allah yo sundok mie kuasa ktine ene epoulun. ⁹Sundok Yesus malan ngket mne, Io kito se erai kongoulun yo nan karan se Matius tunge mbo lou bea, laju Io ngulek epo-iy: "Lumpat Aku ka." Jadi akat ka doko Matius laju lumpat Io.¹⁰ Sundok ene des Yesus kuman mbo lou Matius, ulet ka doko deo pnage bea aiulun dosa ai kuman sama-sama diang Io ai murid-murid-Iyo. ¹¹Montuk desulun Farisi kito nau ene, bsra ka doko dero epo murid-murid Yesus: "Ise moko guru kam kuman sama-sama diang pnage bea aiulun dosa?"¹² Yesus kringo ene laju ngulek: "Makseulun slomai yo prlu dokter, tapiulun krotan." ¹³Jadi malan aut ai bguru beta-beta atok firman endo: Yo pengkakan-Ku yo doko kesong kosang jadi makse prsmbahan, koe Aku ulet makse nte mombaulun yo kono enta, tapiulun dosa."¹⁴ Sundok ene ulet ka doko murid-murid Yohanes epo Yesus ai ngulek: "Ise moko kain diangulun Farisi puasa, tapi murid-murid-Ko belo?"¹⁵ Tuing Yesus epo dero: "Sngkono be nau iyo ena tman-tman pnganten song diang susah-susah kola-kola pnganten ene diang dero? Tapi anta sampe des yo pnganten ene nalek ngket dero bayu montuk des ene doko dero anta puasa."¹⁶ Ndok belo eraiulun nambal baju usang diang diris bayu, koe ena ktine diris pnambal ene anta ngrenset baju ene, jadi tambah sae renset-iy, Ktine low anggur yo bayu belo di natok epo lang kantong upak yo usang, koe ena ktine kantong ene anta renset, jadi-iy anggur ene bkoding ai kantong ene rusak low. Tapi anggur yo bayu onaulun lang kantong yo bayu low, apa diang ktine belo keo yo rugi."¹⁸ Desung Yesus bsara ktine epo dero, ulet ka doko erai kongo pngutok blai smbayang, laju nymbah Io ai ngulek: "Pea-ku bawe bayu ka mate, tapi kompoh aut ai payak ta kayang-Ko ban-iy, apa io jadi bolum."¹⁹ Peles low beta Yesus akat ai nyarakulun ene sama-sama diang murid-murid-Iyo. ²⁰Montuk des ene erai kongo bawe yo sundok duo blas taun roton bawe ngompoh Yesus ngket sori ai ngop tompak jubah-Iyo. ²¹Koe ulek-iy lang kno-iy: "Tontan bulem-ku tingen jubah-Iyo, aku anta ale." ²²Tapi Yesus skuleng ai meti io ulak ngulek: "Pturon beta-beta pngnanam-ko, o pea-Ku, iman-ko sundok nylamat iko." Jadi ngket des ene ale beta doko bawe ene.²³ Des Yesus sampe mbo lou pngutok blai smbayang ene ai kito tukang main suling nte mbo pengineate aiulun deo nangis nungul, ²⁴bsara ka doko Io: "Oroh-oroh ikam, koe pea endo mba di mate, tapi turui." Tapi dero ngoka Io.²⁵ Sundokulun deo ene nusa, Yesus sumba ai ngop tangan pea ene, laju uat ka doko pea ene. ²⁶Jadi sampe ka doko kabar nau umbang ene mbo lekum dnial mne.²⁷ Des

Yesus nerus dalan-Iyo ngket lane, duo kongo ulun posa nyarak-Iyo ulak momba-momba, ulek dero: "Tngkosang-Ko ta kain, o Pea Daud." ²⁸Sundok Yesus sumba lang lou, ulet low duo kongo ulun posa ene ngompoh-Iyo ai Yesus ngulek epo dero: "Prsaya be ikam se Aku kuli mkale-iyoy?" Dero nuing: "Oo Tuhan, kain prsaya." ²⁹Laju Yesus mulem mato dero ulak ngulek: "Jadi beta epo ikam kati iman kam." ³⁰Jadi kolat ka doko oli mato dero. Des ene low Yesus diang beta-beta keo pesan epo dero, ulek-Iyo: "Jaga beta apa nang keo ulun tau nau umbang endo." ³¹Tapi dero baling ai ngesah nau umbang kbuen Io mbo lekum dnia mne. ³²Desung duo ulun posa ene baling, noit low epo Yesus erai kongo ulun pepe yo snumban uok. ³³Des sundok uok ene nusa, tau ka doko ulun pepe ene bsara. Jadi eran ka doko ulun deo ene, ulek dero: "Yo ktine ene belo pini itan ulun mbo Israel." ³⁴Tapi ulun Farisi ngulek: "Diang kuasa tuon uok Io ngusa uok." ³⁵Ktine beta Yesus malan nglekum epo eka-eka kota ai kampong; Io nutui matuk lang low-low awa smbayang ai nyampe Injil Krajaan Sorga ulak mkale eka masam roton ai siet smoleng. ³⁶Kito ulun deo ene, Yesus ulet kanam kosang kesong Yesus epo dero, koe dero mole ai belo di keo snanda kati domba yo belo keo pngamu. ³⁷Jadi ulek-Iyo epo murid-murid-Iyo: "Asil nte utik memang deo, tapi nte bgawi kurang. ³⁸Koe ene tnindu beta-beta epo tuan yo mpun asil nte utik ene, apa Io ngirim pnggawi nte ngutik asil ene."

Chapter 10

¹Yesus momba duo blas murid-Iyo ai mie kuasa epo dero nte ngusa roh-roh triaw ai nte mkale eka masam roton ai siet smoleng. ²Endo doko karan duo blas rasul ene: Yo tla Simon yo nulek Petrus ai Andreas eraibuntung-iyoy, ai Yakobus pea Zebedeus diang Yohanes eraibuntung-iyoy, ³Filipus ai Bartolomeus, Tomas ai Matius pnage bea, Yakobus pea Alfeus, ai Tadeus, ⁴Simon ulun Zelot ai Yudas Iskariot yo nyarah-Iyo. ⁵Duo blas murid ene suyu Yesus ai Io keo pesan epo dero: Nang beta ikam siat epo boyan bangsa yo mak ktine low sumba epo lang kota ulun Samaria, ⁶tapi malan ka epo domba-domba yo mapos ngket ulun-ulun Israel. ⁷Malan ai snampe beta-beta: Krajaan Sorga sundok dmpet. ⁸Pinokale beta ulun krotan; pinonyuli beta ulun mate; pinokale beta ulun roton kodong; nusa beta uok-uok. Ikam sundok kuli ene diang dnine tingen, koe ene die low diang die tingen. ⁹Nang beta ikam moit mas, pirak, tmbaga lang bolit towing kam. ¹⁰Nang beta ikam moit nguy nyarak boyan, nang beta ikam moit baju sloar duo pasang, trumpan pan goloi, koe ulun bgawi arus kuli upa-iyoy. ¹¹Ena ikam sumba kota ktine low kampong, eto ka mbo mne ulun yo sngkono ai nongos ka diang-iyoy sampe ikam brangkat. ¹²Ena ikam sumba lou ulun, die ka salam epo dero. ¹³Ena dero sngkono nrima-iyoy, salam-ko ene diwa ombon dero, ena belo, salam-ko ene mulik epo iko se. ¹⁴Jadi ena ulun belo nrima ikam ai belo di nmpaning pmnsara kam, baling ka ai dikah ka lou ai kota ene ai tompus ka bondul-iyoy ngket botis kam. ¹⁵Aku ngulek epo ikam: Se beta-beta-iyoy ka des olo kiamat tana Sodom diang Gomora anta aso mean ukuman-iyoy se kota ene. ¹⁶Eti, Aku nyemuyu iko kati domba epo ekang sengkalau, koe ene arus yo iko serdik kati nipo ai buen kesong kati dara. ¹⁷Tapi ati-ati epo eka-eka ulun; koe keo yo kakan nyerah iko epo majelis agama ai dero anta ngesa iko lang lou ibadat dero. ¹⁸Ai koe Aku, iko anta pnatak epo onon pnguasa-pnguasa ai raja-raja nte bukti nte dero ai ulun-ulun yo belo tau se Allah. ¹⁹Ena dero nyerah iko, nang ka iko water anta ktimbe ai ise yo arus nte ngko ulek, koe eka-eka ene anta dnine epo iko des ene low. ²⁰Koe makse iko yo bsara, tapi Roh Bapak ko; Io anta yo bsara lang iko. ²¹Ulun anta nyerah erai buntung iyo nte pate, ktine lou uma anta epo pea iyo. Ai bang pea anta nglawan ulun tuo iyo ai anta ngempate dero. ²²Ai ikam anta knekey koe eka-eka ulun koe karan-Ku; tapi ulun yo btahan sampe pnyundok yo pasti slamat. ²³Ena dero ngurow ngesa iko lang kota yo erai, buyo epo kota yo mak; koe Aku ngulek epo iko: Sebata yo iko belo pian sundok nuntun kota-kota Israel, Pea Ulun sundok ulet. ²⁴Erai murid belo anta lengkat se guru iyo, ene low batak ngket tuan iyo. ²⁵Sukup ka nte murid ena io jadi sama kati guru iyo ai batak ena sama kati tuan iyo. Ena mpu lou nulek Beelzebul, aso da atok low iyo. ²⁶Jadi nang ka ikam takut se dero, koe ndok belo erai yo btokom ene anta belo anta belo ningkan ai ndok belo erai yo melim ene anta belo tinonoan. ²⁷Ise yo ulek Ku epo ikam lang seom, ulekka ene lang pa; ai ise yo knonis epo tlingo kam, sampe ka ene ngket ombon sapo. ²⁸Ai nang ka ikam takut se dero yo kuli ngempate kompu, tapi belo keo kuasa nte ngempate nyawa; tnakutka epo Io bute yo keo kuasa nte ngempate nyawa diang kompu mbo lang nraka. ²⁹Belo be mpit jnual duo kikuy erai duit? Tapi ndok belo erai kikuy yo toyak epo tana ena belo koe ptua Bapa ko. ³⁰Ai iko, balo mbo utok ko low sundok nitung eka. ³¹Koe ene nang ka ikam takut, koe ikam aso rarang se mpit deo. ³²Tongku ulun yo ngangkan se Aku mbo onon sama ulun, Aku ngangkan io low mbo onon Bapa-Ku yo mbo sorga. ³³Tapi ise yo belo ngangkan se Aku mbo onon sama ulun, Aku low belo ngangkan se io mbo onon Bapa-Ku yo mbo sorga. ³⁴Nang iko ngontus, se Aku ulet nte moit pmekat mbo dnine; Aku ulet belo di nte moit pmekat, tapi mendau. ³⁵Koe Aku ulet nte nyeing ulun ngket uma iyo, pea bawe ngket ine iyo, nantu bawe ngket ampu bawe iyo, ³⁶ai musu ulun ene ulun-ulun erai low iyo. ³⁷Ise-ise yo kosang diang ine uma iyo lengkat se epo Aku, io belo sengkono nte Oki; ai ise-ise yo kosang epo pea yo song ai bawe lengkat se epo Aku, io belo sengkono nte Oki. ³⁸Ise-ise yo belo moson salib iyo ai lumpat Aku, io belo sengkono nte Oki. ³⁹Ise-ise yo nahan kesong iyo, io anta mapos kesong iyo, ai ise-ise yo mapos kesong iyo koe Aku, io anta kuli iyo. ⁴⁰Ise-ise yo nrima ikam, io nrima Aku, ai ise-ise yo nrima Aku, io nrima Iyo yo nyemuyu Aku. ⁴¹Ise-ise yo nrima nabi kati nabi, io anta nrima upa nabi, ai ise-ise yo nrima ulun yo kono kati ulun kono, io anta nrima upa ulun kono. Ai ise-ise yo mie danum roni erai sangkir tingen epo erai kongo ulun biasa endo, koe io murid-Ku, Aku ngulek epo ikam: Sebata yo io belo anta mapos upa yo ngket iyo."

Chapter 11

¹Des Yesus sundok mie pesan epo duo blas murid-Iyo, malan Io ngket lane epo nutui matuk ai nyampe Injil lang kota-kota

dero.² Lang sper Yohanes kringo nau gawi gata Kristus,³ Laju nymuyu murid-murid-Iyo ngunti epo-Iyo: "Iko be yo anta ulet ene ena belo arus be kain minte ulun yo mak?"⁴Yesus nuing dero: "Malan ka ia ulek ka epo Yohanes ise yo dingo kam ai itan kam: ⁵ Ulun posa kito, ulun pokung malan, ulun kodong jadi ale, ulun simpong kringo, ulun mate tinom bolum ai epo ulun kao snampe kabar buen. ⁶ Ego bah ulun yo belo di noli ai belo di nolak Aku."⁷Des murid-murid Yohanes malan, mulai doko Yesus ngesah epo ulun deo ene nau Yohanes: " nte ise ikam malan epo padang gurun? meti bulu yo guwai guwai kukui riut ? ⁸jadi Nte ise ikam malan? meti ulun yo spakai buen? ulun yo spakai buen ene awa io mo istana raja. ⁹Nte ise ikam malan? meti nabi? beta, ai Aku ngulek epo ikam, aso lengkat se nabi. ¹⁰ Koe nau umbang io keo tnulis:Etika, Aku nymuyu wakei-Ku ono se Iko, io anta ngraduh boyan-Ko, onon-Iko.¹¹Aku ngulek epo ikam sebetayo keo ngket dero yo kinomekus koe bawe belo pini nyoret erai ulun yo olai se Yohanes pembaptis, tapi yo paling idi lang krajaan sorga, aso olai se io. ¹²ngket pngnyoret Yohanes Pembaptis nok tempo ndo, krajaan sorga bnelok ia ulun yo ngembelok ene nyoba bskaku.¹³Koe eka nabi ai kitab taurat nyampe pentau Tuhan nok pngenyoret Yohanes ¹⁴ ai- ena ikam kakan nrima-io - ene doko Elia yo anta ulet ene. ¹⁵ Ise keo tlingo, io arus nmpaning!¹⁶Diang ise anta Aku mmerawet nau poka endo? Dero ene sama kati pea-pea yo tunge la pakot ai momba tman-tman dero: ¹⁷ Kain nyiup suling nte ngkam, tapi ikam belo nuyo, kain nglagu legu luwai, tapi ikam belo nangis nyoru.¹⁸Koe Yohanes ulet, io belo kuman, ai belo isop ai dero ngulek: Io snumban uwok. ¹⁹ Nua Pea Ulun ulet, Io kuman ai isop, ai dero ngulek: eti ta, Io Ulun galak kuman, ai pngisop, tman pnage beo ai ulun dosa. Tapi hikmat Allah sinongkono koe gawi ene."²⁰Laju Yesus mulai mtegur kota-kota yo belo btobat, walau mne Iyo paling deo nampa mujizat-mujizat-Iyo: ²¹ "ssa beta iko Khorazim! ssa beta iko betsaida! koe ena mo tirus diang mo sidon jadi mujizat-mujizat yo sundok jadi mo ekang ikam, sundok ola dero btobat ai nangis nyoru. ²² Tapi Aku ngulek epo ikam: des olo kiamat, tanggung Tirus diang Sidon anta mean se ukuman ko. ²³ Ai iko kapernaum, anta be iko pinokombo sampe langit? Belo, iko anta pinodiwa sampe dnia ulun mate! koe ena mo sodom jadi mujizat-mujizat yo sundok jadi la ekang ikam, kota ene aso tngkorong sampe olo ndo. ²⁴ Tapi Aku ngulek epo ikam: des olo kiamat, ukuman sodom ene anta aso mean se ukuman kam."²⁵Des ene ngulek Yesus: Aku ngulek sukur epo-Iko, Bapa, Tuhan langit ai dnia, koe eka eka ene ona-Ko nte ulun paham ai pintar, Tapi Iko mkelak epo ulun ulun biasa. ²⁶ Ya Bapa,ene doko yo sngkono mo Iko. ²⁷ Eka sundok snrah epo- Aku koe BapaKu ai nok belo erai kongo ulun yo tau se Pea makse Bapak bute nok belo erai kongo ulun yo tau se Bapak makse Pea bute ai ulun yo epo io Pea ene sngkono kesong mmekekak yo. ²⁸Dido ngompoh Aku, eka yo mole lokoi ai pnyekoit boyat, Aku anta miye moang epo iko. ²⁹ Noson beta pngelambar yo payak-Ku ai bguru epo Aku, koe Aku belo di kois koroi ai buen kesong apa pnymbolum ko kuli tnang. ³⁰ Koe pngelambar yo payak Ku ene buen kanam ai pnyekoit-Ku lou mean.

Chapter 12

¹Des jman ene, montuk olo Sabat, Yesus malan mbo umo gandong. Koe slau, murid-murid Iyo ngutik bua gandong ai kuman iyo. ² Kito ene, bkesah doko ulun-ulun Farisi epo-Iyo: "Eti Ko ta, murid-murid Ko keo gawi yo kinondion des olo Sabat."³Tapi tuing Yesus epo dero: "Belo be ikam ngebaca ise yo gnawi koe Daud, des io diang dero yo nyarak iyo slau, ⁴timbe nau io sumba lang lou Allah ai timbe nau dero kuman roti nurai yo belo kate nokan, nte iyo ai diang dero yo nyarak iyo, ena belo koe imam-imam?⁵Ktine low, belo be ikam ngebaca lang kitab Taurat, se des olo-olo Sabat, imam-imam ngelanggar ukum Sabat lang Bait Allah, tapi belo di sala? ⁶Aku ngulek epo ikam: Ela mendo keo yo ngombo se Bait Allah.⁷Ena memang ikam paham ptua firman endo: yo PengkakanKu yo ene pngosang ai makse persembahan, pasti ikam belo di ngukum ulun yo belo di sala. ⁸Koe Pea Ulun ene doko Tuhan ombon olo Sabat."⁹Des malan ket lane, Yesus sumba lang lou sembayang dero. ¹⁰Ela mne keo erai kongo ulun yo pate bika tangan iyo. Dero ngunti diang Iyo: "Kate be mengkale ulun montuk olo Sabat?" Ptua dero ene apa kuli memesala Iyo.¹¹Tapi Yesus ngulek epo dero: "Ena erai kongo ngket ikam keo domba ai domba ene latu lang luang montuk olo Sabat, belo be io nangop ai nembaling iyo?¹² belo be ulun pawak rarang se uman domba? Koe ene kate keo gawi buen mbo olo Sabat."¹³Trus ulek Yesus epo ulun ene: "Sokoi ta tangan ko!" peles io nyokoi, langsung ale tangan iyo, jadi ale kati tangan yo bika. ¹⁴Laju baling doko ulun-ulun Farisi ene ai bpekat nte ngempate Iyo.¹⁵Tapi Yesus tau kno dero peles Iyo makat ngket lane. Deo ulun yo nyarak Yesus ai Io mkale eka-eka dero.¹⁶ Io diang bol-bol ngusan dero memetau ise Io ene, ¹⁷apa pinognap firman yo snampe koe nabi Yesaya:"Eti ka, ene Batak-Ku yo pili Ku, yo tengkosang Ku, yo epo yo kesong Ku sengkono; Aku anta mayak roh-Ku mbo-Iyo, ai Io nyengkono ukum epo bangsa-bangsa.¹⁸Io belo anta selentuing ai belo anta keo oyon ries ai ulun belo anta kringo oyon-Iyo ela boyan-boyana. ¹⁹Bulu yo tepok blopek belo anta di tembekat-Iyo, ai sumbu yo idik dolan yo belo di anta plensop-Iyo, sampe Io nampa ukum ene kuret. ²¹ Ai epo Iyo doko anta bangsa-bangsa ngarap."²²Sundok ene doko noit erai kongo ulun yo snumban uok epo Yesus. Ulun ene posa ai pepe, laju Yesus mkale iyo, peles low ulun ene bunyal ai kito. ²³ Ulun deo yo keo mbo mne jadi eran, laju ngulek: "Io endo ungka yo Pea Daud."²⁴Tapi des ulun Farisi kringo ene, dero ngulek: "Diang Beelzebul, tuon uok, Io ngusa uok."²⁵ Tapi Yesus tau akal dero, laju ngulek epo dero: "Tongku-tongku krajaan yo sangko lawan diang erai-erai pasti ancur ai tongku-tongku kota ktine low pngempanan yo sangko lawan diang erai-erai belo anta tahan ola.²⁶Ene low doko ena iblis ngusa iblis, io tbagi-bagi low ai nglawan iyo se; timbe nau krajaan iyo kate btahan?²⁷Jadi ena Aku ngusa setan diang kuasa Beelzebul, diang kuasa ise murid-murid kam ngusa iyo? Koe ene dero ka yo anta jadi pmutus ngkam."²⁸Tapi ena Aku ngusa uok diang kuasa Roh Allah, sebata yo Krajaan Allah sundok ulet epo ikam. ²⁹Ktine low ktimbe nau ulun sumba lang lou ulun galak ai ngrampas pengkeo iyo, ena belo bnolit ile ulun yo galak ene? sundok bnolit ile bayu kuli ngrampas lou ene.³⁰ Ise yo belo diang Aku, io nglawan Aku ai ise yo belo di nembun sama-

sama diang Aku, io ngoker.³¹ Koe ene Aku ngulek epo ikam: Eka dosa ai uja ulun nampun, tapi nguja Roh Kudus belo anta nampun.³² Ena ulun bunyal yo nglawan Pea Ulun, io nampun, tapi ena io nglawan Roh Kudus, io belo anta nampun, ela dnia endo belo, ai dnia yo anta ulet belo low.³³ Ena keo tonga kayu yo ulek ko buen, pasti buen low bua yo; ena keo tonga kayu yo ulek ko dat, pasti dat low bua yo. Koe ngket bua yo tonga kayu ene ulun tau.³⁴ O ikam yo upus nipo muro, timbe nau kam kate bunyal nau umbang yo buen, ena ikam se yo dat? Koe yo baling ngket bowa ene nyoret ngket kesong.³⁵ Ulun yo buen nembaling nau umbang yo buen ngket awa pngona yo buen ai ulun yo dat nembaling nau umbang yo dat ngket awa pngona yo dat.³⁶ Tapi Aku ngulek epo ikam: Tongku bunyal yo belo otang yo nulek koe ulun ene arus tnanggung montuk olo kiamat.³⁷ Koe kati pemesara kam, ikam pinokono, ai koe kati pemesara kam low ikam anta nukum.³⁸ Des ene tenu-tenu kongo ahli Taurat diang ulun Farisi ngulek epo Yesus: "Guru, kain kakan kito nau tanda ngket Iko."³⁹ Tapi tuing Iyo epo dero: "Pokan yo triaw ai belo stia endo tindu tanda. Tapi epo dero belo anta dnine tanda yo mak se tanda nabi Yunus.⁴⁰ Koe kati Yunus lang buntung esa tolu olo tolu malom, ktine lou Pea Ulun tolu olo tolu malom lang tana. Des jman kiamat, ulun-ulun Niniwe anta nyuli sama-sama diang pokan endo ai ngukum iyo low. Koe ulun-ulun Niniwe ene btobat des kringo kabar ngket Yunus, sebata yo mbo mendo keo yo lengkat se Yunus! Des jman kiamat, ratu ngket selatan ene anta nyuli sama-sama diang pokan endo ai io anta nukum iyo low. Koe ratu endo ulet ngket tompak dnine nte nempaning hikmat Salomo, sebata yo mbo mendo keo yo lengkat se Salomo!"⁴¹ Ena roh triaw baling ngket ulun, io nyabu ka oli epo awa-awa yo tana dat meto awa nongos. Tapi io belo di ruku.⁴² Laju io ngulek: Aku anta mulik nua epo lou yo sundok dikah ku ene. Malan doko io ai ruku low ene osaw, brese snapu ai natur buen.⁴³ Laju io baling diang moit turu roh yo mak yo triaw aso se io trus dero sumba peles nongos mne. Pnyundok yo nau ulun ene tambah triaw ngket nau yo ono. Ktine low anta pengkono pokan yo triaw endo."⁴⁴ Des Yesus aso bkesah diang ulun deo ene, Ine-Iyo diang erai buntung-erai buntung Iyo akat ela baling ai bkomer ngruku Iyo.⁴⁵ Erai kongo ngulek diang Iyo: "Eti Ko ta, ine-Ko diang erai buntung-erai buntung Ko keo ela baling ai bkomer ngruku Iko."⁴⁶ Tapi tuing Yesus epo ulun yo nyampe kesah ene epo Iyo: "Ise ine-Ku? ai ise erai buntung-erai buntung Ku?"⁴⁷ Bayu Iyo ngulek, ulak nutui epo tadah murid-murid Iyo: "Ndo ine-Ku ai erai buntung-erai buntung Ku!"⁴⁸ Koe ise-ise yo nggawi ptua Bapak-Ku ela Sorga, iyo ene erai buntung Ku song, iyo ene erai buntung Ku bawe, iyo ene ine-Ku."

Chapter 13

¹Des olo ene Yesus baling ngket lang lou ene laju tunge mbo isan gntung. ²Deo ulun ulet bloyun-loyun nglekum-Iyo, koe ene Io dombo epo lang prau laju tunge mbo mne, tapi ulun-ulun deo ene eka-eka yo akat mbo nyarak diwe.³ Io deo nutui matuk dero diang mrawat nau enah enduh epo dero. Ulek-Iyo: "Ulun yo tukang skulo ene baling nte skulo. ⁴Des jman yo nabur bini, bini oit io ene keo tenga yo latu mbo nyarak boyan, laju ulet mpulu nungka kuman yo ndok eka. ⁵Keo tenga yo latu mbo dnine yo jut batu, yo belo di beka keo tana yo, bini ene kate se moti koe keo bgamat idik2 tana yo. ⁶Tapi des mato olo melak, yo layo laju pnyundok yo krep koe belo keo wakat. ⁷Keo tenga yo latu mbo lang orop, orop ene tambah mroa nylingu oti ene turai pate. ⁸Ai keo low yo latu mbo tana buen kate sampe kbua: keo yo kate ngasil jatus lipat, keo yo onom pulu lipat, keo yo tolu pulu lipat. ⁹Ise yo keo tlingo, moko yo io nmpaning!"¹⁰ Murit-murit-Iyo ulet laju ngunti epo-Iyo "Ise moko Iko nutui matuk dero diang pmrawet?"¹¹ Tuing Yesus: "Epo ikam sundok dnine krunia nte tau rasia Krajaan Sorga, tapi epo dero belo. ¹²Koe ise yo keo, epo io anta dnine sampe ruak ruau; tapi ise yo belo keo ise2, ise yo keo mbo io nalek eka. ¹³Koe ene doko Aku ngulek diang pmrawet epo dero; koe beta ko dero meti, dero ene belo di kito, koe dero nmpaning, dero ene belo di kringo ai belo tau rti. ¹⁴Epo dero ene gnab nubuat Yesaya, ktindo otang iyo: Dero ene dor nempaning tapi belo tau unong; dero ene dor kito, tapi belo tau rti. ¹⁵Koe kesong ulun-ulun endo sundok buntat, ai tlingo dero boyat nte nempaning, diang mato dero pinoringit; apa belo dero meti diang mato dero, belo nempaning diang tlingo dero ai belo tau unong diang kesong dero, nte dero skuleng apa Aku mmkale dero. ¹⁶Tapi untung beta mota kam yo kito, diang tlingo kam yo kringo ¹⁷Koe Aku ngulek epo ikam: Sbata yo deo nabi diang ulun-ulun buen kakan kito kati pngkito kam, tapi dero belo kito, ai kakan kringo kati kati pngkingo kam, tapi belo dero kringo. ¹⁸Koe ene tempaning kam rti pmrawet nau umbang ulun tukang skulo ene. ¹⁹Epo tongku ulun yo nempaning pirman umbang krajaan sorga, tapi belo tau unong, ulet yo tuju gawi triaw laju ngalek ise-ise yo sundok nulo lang kesong dero; yo ene bini yo toyak mbo nyarak boyan. ²⁰Bini yo tnias mbo dnine jut batu, yo ene ulun yo nempaning pirman ene laju nrima yo diang pngnanam ego. ²¹Tapi iyo belo kate tumbu wakat ai belo kate tahan ola. Ena ulet sngsara ai kono ptunjol koe pirman ene, peles ulun ene murtad. ²²Bini yo toyak mbo tenga orop ene, kati ulun yo nmpaning pirman, tapi water diang nau pnyumbolum dero ai kakan bolum srba, nyngkatel pirman ene nampa belo tau keo bua. ²³Yo tnias mbo tana buen yo ene ulun yo nmpaning pirman ene ai tau rti iyo, koe ene yo keo bua, keo yo jatus lipat, keo yo onom pulu lipat, keo yo tolu pulu lipat."²⁴ Yesus ngesah nau pmrawet yo mak nua epo dero, ulek Iyo: "Umbang Krajaan Sorga ene kati ulun yo nabur bini yo buen mbo umo iyo. ²⁵Tapi des desung eka ulun turui, ulet bali iyo nabur bini dikut mbo ekang gandong ene, laju buyo. ²⁶Des gandong ene tumbu ai mulai baling bua, melak low dikut ene. ²⁷Batak-batak ulun yo keo umo ene ulet epo iyo ai ngulek: Tuan, bini buen apo, yo ulo tuan mbo umo ene? ngket mbe dikut ene? ²⁸Tuing tuan ene, 'keo bali ku yo keo gawi ene. Batak-batak ene ngulek epo iyo: kakan be tuan apa kain epo ngukat dikut-dikut ene?'²⁹ Tapi iyo ngulek: Koyoh ka, koe gandong ene tau lumpat rukat montuk ikam ngukat dikut ene. ³⁰Koe ka sama tumbu mne sampe des jman nte ngani. Des ene aku ngulek epo tukang ngani: Kumpul kam ile dikut ene, binorokos nte tuna; sundok ene kumpulkam gandong ene epo lang longkongku."³¹ Yesus ngesah nau pmrawet yo mak nua epo dero, Ulek Iyo: "Umbang Krajaan Sorga ene kati bigi jabung, yo nalek laju tnabur mbo umo iyo."

³²Bigi jabung ene bini yo paling alus, tapi ena sundok tumbu, jabung ene paling olai ngket pnykulo jnis deli yo mak, yo jadi keo tonga, sampe mpulu-mpulu ulet nampa salai mbo paka-paka yo."³³Diang Iyo ngesah low umbang pmrawet ktindo epo dero: "Umbang Krajaan Sorga ene kati kompal roti yo nalek koe ulun bawe laju bnobo diang jlpong gandong opat pulu liter sampe kmbong beta."³⁴Eka-eka ene ptutui batuk Yesus epo ulun deo diang pmrawet, ndok belo erai Iyo keo nutui matuk dero ena belo diang pmrawet,³⁵Apa gnep pirman yo snampe koe nabi: "Aku kakan ngingkang bowa-Ku diang pmrawet, Aku kakan ngulek umbang yo melim ngket dnia tnampa."³⁶sundok ene Yesus malan ngket ulun deo ene, sumba epo lang lou. Murit-murit-Iyo ulet ai ngulek epo-Iyo: "Jelas ko epo kain pmrawet umbang dikut mbo umo ene."³⁷To nuing, ulek-Iyo: "Ulun yo nias bini buen yo ene Pea Ulun,"³⁸umo ene dnia endo. Bini yo buen ene pea-pea Krajaan ai dikut ene pea-pea yo triau.³⁹Bali yo nabur bini dikut yo ene iblis. Jman nte ngani ene olo balik bekat, ai yo tukang-tukang ngani ene mlekat.⁴⁰Kati dikut-dikut yo knumpul laju tnuna epo lang api, ktine low des jman olo balik bekat anta.⁴¹Anta Pea Ulun nyuyu mlekat-mlekat-Iyo, dero ngumpul ise-ise yo nampa tang ai eka ulun yo gawi triaw ngket lang krajaan-Iyo.⁴²Eka-eka dero noding epo lang bliku api; mbo lane dero nangis nontoi diang ngrgigep kukut.⁴³Des ene ulun-ulun buen brse anta keo pa kati pa olo lang Krajaan Bapa dero. Ise yo keo tlingo, moko yo nte nempaning!"⁴⁴Umbang Krajaan Sorga ene kati rta yo nruku koe ulun lang tana, ona koe yo nua lang tana ene. koe kanam ego yo ngenjual eka-eka pngkeo iyo nte moli tana ene.⁴⁵Ktine low umbang Krajaan Sorga ene kati erai kongo ulun tukang dagang yo meto mutiara yo buen nau.⁴⁶Des sundok ruku mutiara yo uman yo larang, io ngnjual ndok eka pngkeo iyo nte moli mutiara ene."⁴⁷Ktine low umbang Krajaan Sorga ene kati rengge tasik yo noseng mbo tasik, laju kuli bmasam jnis esa.⁴⁸Des sundok punet, rengge ene dnurut epo diwe, dero tunge ngumpul esa yo buen epo lang pti tong, esa yo belo buen oding dero.⁴⁹Ktine low mbo pnyundok dnia: Mlekat-mlekat ulet nte ngmakse ulun akal triau ngket ulun buen,⁵⁰bayu moding ulun yo triau epo lang bliku api; mbo lane keo tangis tontoi diang ngrgigep kukut.⁵¹Unong be ikam eka-eka ene?" Dero nuing: "O,o kain unong."⁵²Yesus ngulek epo dero: "Koe ene tongku ahli Torat yo kuli ptutui batuk ngket umbang Krajaan Sorga ene kati ulun mpu lou yo nembaling rta yo bayu diang yo usang ngket lang pnykona iyo."⁵³Sundok Yesus ngesah nau pmrawet-pmrawet ene, Iyo malan ngket awa mne,⁵⁴Sampe Iyo mbo kota-Iyo, Yesus nutui matuk ulun-ulun mbo mne lang lou ibadat dero. Dero eran laju ngulek: "Ngket mbe yo kuli pntau ene ai kuasa nte nampa mujisat-mujisat ene?"⁵⁵Mak be Iyo ene pea tukang kayu? Mak be ine Iyo yo karan se Maria diang erai buntung- erai buntung-Iyo: Yakobus, Yusuf, Simon ai Yudas?⁵⁶Ai mba be erai buntung - erai buntung Iyo yo bawe keo litak lituk ekang taka? Jadi ngket mbe Iyo kuli eka-eka ene."⁵⁷Dero belo sngkono kesong laju nolak se Iyo. Yesus ngulek epo dero: Nabi ene hormat ulun mbo mone-mone, belo ube mbo dnia iyo se ai lang lou blai iyo se."⁵⁸Koe dero belo prsaya, belo deo mujisat tampa-Iyo mbo mne.

Chapter 14

¹Des ene sampe doko pamusara-pamusara nau umbang Yesus epo Herodes, raja mbo denia mne.²Trus io ngulek epo prewa-prewa io: "Ndo doko Yohanes tukang baptis; io sundok nyuli ngket ekang ulun mate ai ene doko tukuniyo kuasa-kuasa ene keo gawi mbo lang -Iyo."³Koe onon ene Herodes sundok nyemuyu nangop Yohanes, mansongiyo ai nguongiyo lang sper, koe keo tukun diang Herodias, bawe Filipus erai buntungiyo.⁴Koe Yohanes pini ngaeyo, ulekiyo: "belo kate iko nembawe Herodias!"⁵Herodes kakan ngempateiyo, tapi io takut se ulun deo yo nganggap se Yohanes ene nabi.⁶Tapi des olo ulang taun Herodes, nuyo ka doko pea bawe Herodias mbo ekang dero ai mesenang kesong Herodes,⁷sampe Herodes berputus anta miye epo io ise ka pninduiyo.⁸Jadi des sundok suyu ineiyo, pea bawe ene ngulek: "Die ko ta aku mndo utok Yohanes tukang baptis ene ombon par talam."⁹laju nyoru ka kesong raja, tapi koe io sundok berputus ai koe peri-periyo suyuio ka oli nte miyeiyo.¹⁰Io nyemuyu ngempung utok Yohanes mbo sper¹¹ai utok Yohanes ene lou oit ulun ban par talam, trus dneie epo bawe ngelok ene ai io moitiyo epo ineiyo.¹²Sundok ene ulet ka murid-murid Yohanes tukang baptis ene ngalek antuiyo ai nglowongiyo. Laju dero brangkat memetau ene epo Yesus.¹³Sundok Yesus kringo kabar ene makat Io ngket mne, ai kakan bedeing iyo ba diang peraw epo awa yo belo rame. tapi ulun deo kringo ene ai nyarak Io ngelalo te-te boyan tana ombo ngket kota-kota dero.¹⁴Des Yesus sungket epo tana ombo, Io kito ulun deo beta, jadi timbul ka doko pengananam kosang epo dero jadi Io mkale dero yo krotan.Desung ilang ilot, murid-murid-Iyo ngompoh Io ai ngulek: "awa endo deing ai denia mulai seom. Syu Ko ta uli ulun deo ene apa dero kuli moli nte dero okan mbo kampong-kampong."¹⁵Tapi ulek Yesus epo dero: "Belo di koyoh dero uli, ikam arus makan dero."¹⁷Tuing dero: "Yo keo mbo kain mendo puluniyo limo bis jaja, ai duo kukuy esa."¹⁸Yesus ngulek: "Oit kam ta dido epo Aku."¹⁹Laju suyu Io ulun deo ene tunge ban dikut. Ai sundok Io ngalek limo bis jaja ai duo kukuy esa ene, Yesus nyonda epo langit ai mengulek berkat, trus ngrinsi-ngrinsi jaja ene ai mieiyo epo murid-murid-Iyo, trus murid-muridIyo ngmbagi ene epo ulun deo.²⁰Ai dero kuman ndok boting. Sundok ene ulun ngumpul bas bis roti yo kasan, duo blas kepit ponu.²¹Yo lumpat kuman kira-kira limo ribu kongo bang song, belo pian bang bawe ai pea-pea.²²Sundok ene Yesus nyemuyu resi-resi murid-murid-Iyo dombo epo lang praw ai ono se Io epo mpai, des ene Io nyemuyu ulun deo ene uli.²³Ai sundok ulun deo ene suyu-Iyo uli, Yesus dombo epo usuk tunden nte bedoa sederai. Des denia sundok malom, Io ba-ba la mne.²⁴Peraw murid-murid-Iyo sundok tenu-tenu mil koroioyo ngket pantai ai goling giloi koe umbak, koe wayat sakal.²⁵Kira-kira jam tolu malom ulet ka doko Yesus epo dero malan ban danum.²⁶Des murid-murid-Iyo kito se Io malan ban danum, dero tekojet ai besara ries: " Nduh uwok!", trus dero nyoyar-nyoyar koe takut.²⁷tapi resi Yesus ngulek epo dero: "tnang ka ikam! Aku endo, nang takut!"²⁸Laju Petrus besara ries ai nuing Io: "Tuhan, ena Iko ene, suyu ta aku ngompoh Iko malan ban danum."²⁹Ulek Yesus: " kompoh ka! " Jadi Petrus diwa ngket praw ai malan ban danum ngompoh Yesus.³⁰Tapi des io kiso kanam tapi riyut, io jadi takut ai

mulai lotong laju nyoyar: "Tuhan, awat ta aku!"³¹Peles Yesus nyokoi tangan- Iyo, ngop io ai ngulek: "O ulun kurang persaya, ise moko iko water?"³² Laju dero dombo epo lang praw ai riut lou jadi teno.³³ Ai ulun-ulun io keo mbo peraw nyembah Io, Sebetaiyo Iko Pea Allah."³⁴Des ampe ela mpai dero sungket mbo Genesaret.³⁵Des ulun-ulun mne tau se Yesus , dero nyampe kabar ene epo pupus ja mne. Jadi eka ulun yo kroton noit epo-Iyo.³⁶Dero tindu apa kate mulem tompek jubah-Iyo. Jadi eka ulun yo mulem-Iyo jadi ale.

Chapter 15

¹Sundok ene ulet doko tenu-tenu ulun Farisi diang ahli Torat ngket Yerusalem epo Yesus ai ngulek:²" Ise mko murid-murid-Io nglanggar adat istiadat itak kakah taka? Dero belo mui kayang des onon kuman."³Tapi tuing Yesus epo dero: "Ise mko ikam lou nglanggar suyu Allah koe adat istiadat itak kakah kam?"Koe Allah befirman: Tunduk diang ine uma ko; ai nua: Ise yo mator nyumpah ine uma yo pasti kono ukum pate.⁵Tapi ikam ngulek: Ise-ise yo ngulek epo ine uma yo: Ise yo keo ela aku yo dapet pnakai nte nmbolum ngko, sundok pnakai nte die sokoi epo Allah,⁶ulun ene belo kotoh oli tunduk epo ine uma yo. Diang ktine firman Allah mbo ikam belo pnakai koe adat istiadat kam se.⁷O ulun pura-pura persaya! Beta doko ulek Tuhan tete Yesaya nau umbang kam.⁸Bangsa endo ngmulia Aku diang biwi bowa yo, pdahal kesong yo oroh ngket Aku.⁹Belo keo jodo dero sbayang epo-Aku, pdahal tutui batuk yo tutui batui dero ene ptua ulun."¹⁰Laju Yesus momba ulun deo ai ngulek epo dero:¹¹"Tempaning ai knanam beta: makse yo sumba lang bowa yo nglonsa ulun, tapi yo baling ngket bowa, ene dko yo nglonsa ulun."¹²Jadi ulet doko murid-murid-Iyo ai ngunti epo-Iyo: "Iko tau se pmensara-Ko ene sundok jadi batu nte tutur ulun-ulun Farisi?"¹³Tuing Yesus: "Tongku-tongku pnyekulo yo belo dinulo koe Bapa-Ku yo mbo sorga anta nukat diang wakat-wakat yo."¹⁴Koe ka dero ene. Dero ulun posa yo ngayak ulun posa. Ena ulu posa ngayak ulun posa, pasti dero duo toyak epo lang luang."¹⁵Laju Petrus ngulek epo-Iyo: "Jelas ko ta pmerawet ene epo kain."¹⁶Tuing Yesus: "Ikam lou belo pian paham ene?"¹⁷Tau be ikam tau se eka-eka yo sumba lang bowa diwa epo lang buntung trus noding epo pndosan?"¹⁸Tapi ise yo baling ngket bowa ene ngket kesong ai ene doko yo nglonsa ulun."¹⁹Koe ngket kesong nyoret eka akal dat, ngempate, zinah, pokeng koreng, pengako, sumpah kowau ai uja."²⁰Ene doko yo nglonsa ulun. Tapi kuman diang kayang yo belo di bnui belo nglonsa ulun."²¹Laju Yesus malan ngket mne ai bsimpeh epo kampung Tirus diang Sidon."²²Jadi ulet doko erai kongo bawe Kanaan ngket ja eme ai momba: "Tngkosang ta aku, o Tuhan, pea Daud, koe pea ku bawe sumban uwok ai sesa beta."²³Tapi Yesus sama skali belo di nuing yo. Laju murid-murid-Iyo ulet ai tindu epo-Iyo: "Suyu ta io buyo, io nyarak taka diang nyoyar-nyoyar."²⁴Tuing Yesus: "Aku snuyu nte epo domba-domba yo mapos ngket ulun-ulun Israel tingin."²⁵Tapi bawe ene epo dmpet ai nyembah Iyo ulak ngulek: "Tuhan awat ta aku."²⁶Tapi Yesus nuing: "Belo sengkono ngalek roti yo snedia nte pea-pea diang nebir yo epo koko."²⁷Ulek bawe ene: "Beta Tuhan, tapi koko ene kuman uras-uras okan yo toyak ngket meja mpu yo."²⁸Laju Yesus nuing ai ngulek: "O mena, olai iman ko, mko ene jadi se epo iko kati yo pngkakan ko." Des ene se lou pea yo ale.²⁹Sundok ngendikah kampung ene Yesus malan nyarak pinggir gentung Galilea ai dombo epo ombon tenggelung laju tunge mbo mne.³⁰Sundok ene ulun deo bloyun-loyun ulet epo-Iyo moit ulun pokung, ulun tempang, ulun posa, ulun pepe ai deo aso yo mak, laju mayak dero montuk botis Yesus ai Io mmekale dero eka-eka."³¹Laju bengong ulun deo ene kito ulun pepe bunyal, ulun tempang ale, ulun pokung malan, ulun posa kito, ai dero ngmulia Allah Israel."³²Laju Yesus momba murid-murid-Iyo ai ngulek: "Kesong-Ku timbul kosang epo ulun deo ene. Sundok tolu olo dero nyarak Aku ai dero belo keo nte okan. Aku belo kakan nyuyu dero diang siet lau, nindo dero tanjal nyarak boyan."³³Ulek murid-murid-Iyo epo-Iyo: "Ktimbe mbo awa deing endo taka kuli roti nte nmboting ulun yo deo beta endo?"³⁴Ulek Yesus epo dero: "Tenu roti keo mbo ikam?" "Turu," tuing dero, "ai keo aso tenu-tenu esa alus."³⁵Laju Yesus nyuyu ulun deo ene tunge mbo tana."³⁶Sundok ene Io ngalek turu roti ai esa-esa ene, ngusap sukur, mrinsi-mrinsi yo ai mie yo epo murid-murid-Iyo, laju murid-murid-Iyo magi ene lou epo ulun deo."³⁷Ai dero eka-eka kuman sampe boting. Sundok ene ulun ngumpul bis-bis roti yo sisa, turu kepit ponu."³⁸Yo lumpat kuman ene opat ribu bang song pian nitung bang bawe ai bang pea."³⁹Laju Yesus nyuyu ulun deo ene uli. Io dombo prau ai btual epo kampung Magadan.

Chapter 16

¹Sundok ene ulet doko ulun-ulun Farisi ai saduki kakan nyoba Yesus. Dero tindu apa Io memekelak tanda ngket sorga epo dero.² Tapi tuwing Yesus: "Des olo nayap koe langit meya, ikam ngulek: Olo anta buen,³ai des ma olo, koe langit meya ai jou, ikam ngulek: Olo dat. Nau langit ikam tau nembada yo tapi tanda-tanda zaman belo.⁴Pokan yo triau ai belo stia endo tindu se tanda. Tapi epo dero belo anta dniye tanda yo makse se tanda nabi Yunus." Laju Yesus ngendikah dero trus brangkat.⁵Des jeman murid-murid Yesus kentas gentung, dero tlengo moit roti.⁶Yesus ngulek epo dero: "Ati-ati ai awas-awas se ragi ulun Farisi ai Saduki."⁷ Koe ene dero bekenanam ai ngulek epo sama dero se: "Ene nulek ke-Iyo koe taka belo moit roti."⁸Des Yesus tau ise yo pengesah dero, Io ngulek: "Ise moko ikam ngesah soal belo keo roti? O'ulun-ulun yo kurang persaya!"⁹Belo pian low ikam paham? Belo be ikam knop aso se limo roti nte limo ribu ulun ene trus tenu kepit roti kumpulkam sundok ene?"¹⁰ Ktine low se turu roti nte opat ribu ulun ene trus tenu kepit kumpulkam sundok ene?"¹¹Ktimbe moko ikam belo paham se makse roti yo ptua Ku. Aku ngulek epo ikam: awas-awas diang ragi ulun Farisi ai Saduki."¹²Des ene bayu dero tau se makse ptua-Iyo apa dero awas-awas diang ragi roti, tapi diang tutui batuk ulun Farisi ai Saduki.¹³Sundok Yesus sampe mbo ja Kaisaria Filipi, Io ngunti epo murid-murid-Iyo: "Ulek ulun, Ise si Pea Ulun ene?"¹⁴Tuwing dero: "Keo yo ngulek: Yohanes Pembaptis, keo low yo ngulek: Elia ai keo low ngulek: Yeremia ena belo erai kongo ngket

nabi-nabi." ¹⁵Laju Yesus ngunti epo dero: "Tapi ise ulek kam,ise se Aku endo?" ¹⁶Tuwing Simon Petrus:"Iko ene Mesias,Pea Allah yo bolum!"¹⁷Ulek Yesus epo iyo: "Ego beta iko Simon pea Yunus koe makse ulun yo ngulek ene epo iko,tapi Bapa-Ku yo mbo sorga. ¹⁸Ai Aku low ngulek epo iko: Iko ene Petrus ai ban batu karang endo Aku anta nengkuat jemaat-Ku ai dnia ulun mate belo anta nguasa iyo. ¹⁹Epo iko anta diye Ku kunci Kerajaan Sorga.Ise yo bolit ko mbo dnia endo anta bebolit mbo sorga ai ise yo oke ko mbo dnia endo anta noke mbo sorga." ²⁰Laju Yesus ngusan murid-murid-Iyo apa nang mere epo ise-ise ulun se Io Mesias. ²¹Ngket jman ene Yesus mulai ngenjelas epo murid-murid-Iyo se Io arus malan epo Yerusalem ai kiso kanam deo kbenasa koe bang tuo-tuo,imam-imam pngutok ai ahli-ahli Taurat,laju pnate ai pinosuli des olo ke tolu. ²²Tapi Petrus ngendurut Yesus epo bika ai ngae Io,ulek iyo: "Tuhan, apa Allah mekoro nau umbang ene! Nau ene belo anta kono Iko. ²³Laju Yesus skuleng ai ngulek epo Petrus: "Buyo ta Iblis.Iko jadi batu nte tutur Oki,koe iko makse ngenanam ise yo knanam Allah,tapi ise yo knanam ke ulun."²⁴Laju Yesus ngulek epo murid-murid-Iyo: "Tongku-tongku ulun yo kakan lumpat Aku,io arus belo nyanda kompu iyo,moson salib iyo ai lumpat Aku. ²⁵Koe ise yo kakan nylamat kesong iyo se,io anta mapos kesong kesong iyo;tapi ise-ise yo mapos kesong iyo koe Aku,io anta kuli iyo."²⁶ Ise jodo yo ulun kuli eka-eka dnia tapi mapos kesong iyo? Ai ise yo dapet die yo nte nganti kesong iyo?²⁷Koe Pea Ulun anta ulet lang kmulia Bapa-Iyo bjuyang diang mlekat-mlekat-Iyo;des jman ene Io anta ngembales tongku-tongku ulun kati gawi gata dero. ²⁸Aku ngulek epo ikam: Se beta-beta yo mbo ekang ulun yo keo mbo mendo keo yo belo anta mate onon se dero kito Pea Ulun ulet jadi Raja lang Kerajaan-Iyo."

Chapter 17

¹onom olo sundok ene Yesus moit Petrus,Yakobus ai Yohanes eraibuntungiyo, ai sama-sama diang dero, Io dombo epo usuk tunden, mbo mne dero ba-ba. ²laju Yesus wesut nau mbo onon mato dero; wae-Iyo kuala kati nau mato olo ai pyepakai-Iyo jadi bura ktarang kati pa olo.³ai nitan epo dero Musa ai Elia desung bunyal diang-Iyo. ⁴ulek Petrus epo Yesus: " Tuhan ego beta kain keo ela mendo. ena Iko kakan, kate ka aku nengkuat tolu kemahn, erai ente Engko, etai ente Musa ai erai iyo ente Elia."⁵Desung io bsurah kolan-kolan diwa jaun keo pa nylingu dero ai engket lang jaun ene keo oyon yo ngulek:" endo doko pea yo knosang koe Ku, epo-Iyo ene aku skono, tinompaning nte-Iyo." ⁶Kringo ene nyongkop murid-murid-Iyo diang dero takut beta. ⁷laju Yesus ulet epo dero diang nengku dero ulak ngulek:" akat ikam nang takut!" ⁸ai des dero nyonda, endo belo kito erai kongo ulun yo mak puluniyo Yesus tingen.⁹Des dero diwa engket tunden ene, Yesus ngulek epo dero:" nang kam kesah pngkito kam ene epo ndok erai kongo ulun ono pea ulun pinosuli engket ekang ulun mate."¹⁰laju murid-murid-Iyo ngunti epo-Iyo: ena ktine ise moko ahli-ahli taurat ngulek se Elia arus ulet ono?"¹¹tuwing Yesus:" betaiyo Elia anta ulet ai nengkuen bmasam nau umbang ¹²jadi Aku ngulek epo ikam: Elia sundok ulet, tapi ulun belo tau se io, diang gawigata dero seiyo kati ptua dero se. Ketine lou pea ulun anta ssa koe dero." ¹³Montuk des ene lou ngerti ka doko murid-murid Yesus se Io bsara nau umbang Yohanes tulang babtis.¹⁴Des Yesus ai murid-murid-Iyo mulik epo ulun deo ene, ulet doko erai kongo ulun ngruku Yesus ai nyembah, ¹⁵ulek io: Tuhan tengkosang-ta peaku, io roton ngembekat ai sesa beta. io jono lutu epo lang api ai jono lou latu epo lang danum. ¹⁶Aku sundok moit io epo murid-murid-Ko, tapi dero belo di kuli mekale io."¹⁷ulek Yesus:" o ikam pokan iyo belo persaya ai iyo tang, kola-kola aso Aku nongos ekang ikam? kola-kola aso Aku arus sabar epo ikam? oit ka pea ene epo mdo!"¹⁸Diang ries Yesus ngae io, laju baling ka doko uok ene engket io ai des ene lou pea ene ale peles.¹⁹sundok enemurid-murid Yesus ulet ai des dero ba-ba diang Iyo, dero ngunti:" koe be kain belo kuli ngusa uok ene?" ²⁰Iyo ngulek epo dero:" koe ikam kurang persaya. koe ene Aku ngulek epo ikam: se beta-betaiyo ena ikam keo Iman kolai bigi jabung tingen ikam kuli ngulek epo tunden endo: wensut engket mendo epo lane,-tunden ene anta wensut, ai belo anta keo yo belo jadi nte engkam ²¹jenis endo belo dapet nusa ena diang bdoa ai puasa, "²²Des jeman Yesus ai murid-murid-Iyo sama-sama ombo Galilea, Io ngulek epo dero:" pea ulun anta snerah epo lang kayang ulun. ²³ai dero anta ngempate Iyo ai mbo olo ketolu Io anta pinosuli." koe ene kesong murid-murid-Iyo jadi nyoru beta.²⁴Des Yesus ai murid-murid-Iyo ulet la kapernaum ulet ulun pnage bea Bait Allah epo Petrus ai ngulek:" belo dimayar be guru ko bea duo dirham ene ?"²⁵tuwingiyo:" mayar de." ai des Petrus sumba lou, Yesus bur ngunti:" ise san ko, Simon? engket mbe raja-raja dnia endo ngalek bea ai pajak? engket rayat iyo be ena belo engket ulun nyumba?"²⁶tuwing Petrus : " engket ulun nyumba!" keo ene Yesus ngulek epoiyo:" jadi bebas deko rayakiyo. ²⁷jadi apa taka nang jadi batu ente dero tutur, malan aut mintan epo gentung, jadi esa tla yo bintang ko, tnakop ai ingkang ka bowaiyo, pasti iko ngruku sen opat dirham lang bowaiyo, alek ene ai bayarka epo dero, nte Oki diang nte engko lou."

Chapter 18

¹Montuk des ene murid-murid ene ngompoh Yesus ai ngunti: "Ise yo olai tingen lang Krajaan Sorga?"²Jadi Yesus momba pea alus ai mayak-iyu mbo ekang dero ³laju ngulek: "Aku ngulek epo ikam, se beta-beta-iyu, ena ikam belo btobat ai jadi kati pea alus endo, ikam belo anta sumba epo lang Krajaan Sorga.⁴Tapi ise-ise ulun yo kakan mmkiwa pngnanam kesong ai jadi kati pea alus endo, io doko yo olai tingen lang Krajaan Sorga. ⁵Jadi ise-ise ulun nrima pea kati endo lang karan-Ku, io nrima Aku." ⁶Tapi ise-ise ulun yo mktang erai ngket pea-pea alus endo yo prsaya epo Aku, pawak buen nte-iyu ena erai batu pnggiling sniret mbo biung-iyu laju io pinolotong epo lang tasik.⁷Lamat beta dnia diang eka sara mktang dero: beta ko pmktang arus keo, tapi lamat beta ka ulun yo nglaku-iyu. ⁸Ena tangan-ko ktine low botis-ko mktang iko, totok ai oding ka ene, koe pawak buen nte ngko sumba epo lang bolum diang tangan pungkong ai tempang se diang goluh duo botis kayang noding epo lang api kden.⁹Ai ena mato-ko mktang iko, sungkit ka ai oding ka ene, koe pawak buen nte ngko

sumba epo lang bolum diang mato bika bute se noding epo lang api nraka diang mato duo.¹⁰Pinoknop beta, nang ngomoi iwa erai kongo ngket pea-pea alus endo. Koe Aku ngulek epo ikam: Keo mlaekat dero mbo sorga yo trus meti wae Bapa-Ku mbo sorga.¹¹(Koe Pea Ulun ulet nte nylamat yo mapos.)¹²Ktimbe san kam? Ena erai kongo ulun keo jatus kukui domba, tapi erai kukui ngket ene tang, belo be io jadi nape yo sie pulu sie kukui ene mbo tunden laju malan meto yo tang ene?¹³Jadi Aku ngulek epo ikam: "Se beta-beta-iyu ena io kuli ngruku-iyu, pawak roa ego-iyu koe yo erai kukui ene se yo sie pulu sie kukui yo belo di tang."¹⁴Ktine low Bapa kam yo mbo sorga belo di nengkakan apa ndok erai kongo ngket pea-pea endo mapos".¹⁵"Ena eraibuntung-ko nglaku dosa, knae doko io iwat opat mato. Ena io ngringo nasehat-ko iko sundok kuli-iyu nua."¹⁶Ena io belo di ngringo iko, oit ka erai kongo ena belo duo kongo ulun nua, apa diang pmnsara duo tolu kongo yo tau beta, soal ene belo keo nte kerong-kerong.¹⁷Ena io belo di kakan ngringo dero, sampe ka oli nau umbang ene epo jmaat. Jadi ena io belo di kakan low ngringo jmaat, eti ka io kati ulun belo tau se Allah ena belo kati pnage bea.¹⁸Aku ngulek epo ikam: Se beta-beta-iyu ise yo siret kam mbo dnia endo anta bsiret mbo sorga ai ise yo oke kam mbo dnia endo anta loke mbo sorga.¹⁹Aso nua Aku ngulek epo ikam: Ena duo kongo ngket ikam mbo dnia endo pkat tindu ise ka low, pnindu dero ene anta dnine koe Bapa-Ku yo mbo sorga.²⁰Koe mbo mone duo tolu kongo ulun bkumpul lang karan-Ku, mbo mne Aku keo mbo ekang dero.²¹Sundok ene ulet ka Petrus ai ngulek epo Yesus: "Tuhan, sampe tenu derang aku arus ngampun eraibuntung-ku ena io nglaku dosa epo aku? Sampe turu derang?"²²Yesus ngulek epo-iyu: "Makse! Makse sampe turu derang, tapi sampe turu pulu derang turu derang."²³Koe nau umbang Krajaan Sorga sama kati erai kongo raja yo kakan britung diang batak-batak-iyu.²⁴Des io mulai britung ene, nadap ka doko epo-iyu erai kongo yo keo utang spulu ribu talenta,²⁵Tapi koe ulun ene belo di klian mayar eka utang-iyu, raja ene nyuyu apa io jnual diang pea bawe-iyu ai eka pngkeo-iyu nte mayar utang ene.²⁶Jadi nyongkop ka doko batak ene nymbah io, ulek-iyu: Sabar ka ile, eka utang-ku anta bayar ku abis.²⁷Laju ulet kanam kosang lang kesong raja ene se batak ene, sampe io ngmbebas-iyu ai ngapus utang ene.²⁸Tapi des batak ene baling, io ruku se batak yo mak yo keo utang jatus dinar epo-iyu. Io nangop ai nyiak tman-iyu ene, ulek-iyu: Bayar utang-ko!²⁹Jadi nyongkop ka doko tman-iyu ene ai tindu epo-iyu: Sabar deh ile, utang ku ene anta bayar ku eka.³⁰Tapi io belo trima ai nyrah tman-iyu ene epo lang sper sampe eka utang-iyu bnayar.³¹Kito ene tman-tman-iyu yo mak jadi dat kanam beta laju nyampe eka yo trjadi ene epo tuan dero.³²Raja ene nyuyu momba ulun ene ai ngulek epo-iyu: O batak yo triaw, eka utang ko sundok apus-ku koe pnindu-ko epo aku.³³Belo be iko low arus nengkosang tman ko kati aku sundok nengkosang iko?³⁴Jadi mara ka doko tuan-iyu ene oli ai nyrah-iyu epo plisi, sampe io mayar eka utang-iyu.³⁵Jadi Bapa-Ku yo mbo sorga anta nglaku ktine low epo ikam, ena tongku ikam belo ngampun eraibuntung kam diang bol kesong kam."

Chapter 19

¹Des Yesus sundok diang tutuy batuk-Iyu ene, berangkat doko Io ngket Galilea ai ulet mbo ja Yudea yo mbo empai atang Yordan.²Ulun deo beloyun-loyun nyarak Io ai Io lou mekale dero mbo lane.³Jadi ulet doko ulun-ulun Farisi epo-Iyu nte nyoba Io. Dero rekunti: "Kate be ulun nytuar baweiyo diang tulan ise masam?"⁴Tuing Yesus: "Belo be ikam ngbaca, se Io yo nampa ulun ngket tla nampa dero song ai bawe?"⁵Ai firman-Iyu: "Koe ene song anta ngendikah ine umaiyo ai kerai diang baweiyo, keduoioyoli jadi erai isi erai daya"⁶Ketine doko dero makse duo oli, tapi erai. Koe ene, ise yo sundok pinokerai koe Allah, belo kate senetuar koe ulun.⁷Ulek dero epo-Iyu: "Ena ktine, ise moko Musa nyuyu nte miye surat setuar ena ulun nyetuar baweiyo?"⁸Ulek Yesus epo dero: "Koe ketokeng kesongkam Musa ngizin ikam nyetuar bawekam, tapi ngket tla belo di ktine."⁹Tapi Aku ngulek epo ikam: Ise-ise ulun nyetuar baweiyo, makse koe zinah, trus kawen diang bawe yo mak, io nggawi zinah."¹⁰Murid-murid ene ngulek epo-Iyu: "Ena ktine nau umbangiyo besong bawe, lebih buen nang kawen."¹¹Tapi Io ngilek epo dero: "Belo di eka ulun kuli ngerti pemesara endo, suma dero yo keo karunia bute."¹²Keo ulun yo belo kuli kawen koe io kinomekus ktine ngket buntung ineiyo, ai keo ulun yo tnampa ktine koe ulun mak, ai keo ulun yo nampa iyo se ktine koe nau pengkakan iyo se koe Kerajaan Sorga. Ise yo paham mokoioyoli io paham.¹³Trus ulun moit pea-pea alus epo Yesus, apa Io mayak kayang-Iyu ombon dero ai ngendoa dero, tapi murid-murid-Iyu ngemara ulun-ulun ene.¹⁴Tapi Yesus ngulek: "Koe ka pea-pea ene, nang ka mombong-mombong dero ngompoh Aku; koe ulun-ulun yo ktine ene yo mpun Kerajaan Sorga."¹⁵Trus Io mayak kayang-Iyu ombon dero ai Io oli berangkat ngket mne.¹⁶Keo erai kongo ulun ulet epo Yesus, ai ngulek: "Guru, gawi buen ise yo arus gawiku nte kuli bolum kden?"¹⁷Tuing Yesus: "Ise moko iko ngunti epo Aku nau ise yo buen? Suma erai Bute yo buen. Tapi ena iko kakan sumba po lang bolum, ngaya ka eka petua Allah."¹⁸Ulek ulun ene epo-Iyu: "Perenta yo mone?" Ulek Yesus: "Nang ngempate, nang bezinah, nang ngako, nang ngulek saksi eta,¹⁹tunduk epo ine uma ko ai tinong kosang sama ulun kati iko se."²⁰Ulek ulun burok ene epo-Iyu:"Eka-eka ene sundok sarakku, ise aso yo nokon kurang?"²¹Ulek Yesus epoioyoli: "ena iko kakan sempurna, malan aut, jenual doko eka pengkeo ko ai deniye epo ulun-ulun kao, jadi iko anta kuli arta mbo sorga, ulet ka oli epo dido ai lumpat ka Aku."²²Des ulun burok ene keringo pemesara ene, malan doko io diang kesong nyoru, koe deo pengkeoiyo.²³Yesus ngulek epo murid-murid-Iyu: "Aku ngulek epo ikam, se beta-betaioyoli poyoh beta ulun tataw nte sumba po lang Kerajaan Sorga."²⁴Sindai nua Aku ngulek epo ikam, aso sepel erai kukuy unta sumba lang luang pilos se erai kongo ulun tataw sumba po lang Kerajaan Allah."²⁵Des Murid-murid kringo ene, tekojet beta doko dero ai ngulek: "Ena ktine, ise po yo kuli sinolamat?"²⁶Yesus meti dero ai ngulek: "Nte ulun nau umbang ene belo anta dapet, tapi nte Allah eka-eka nau umbang ene dapet ba."²⁷Trus Petrus nuing ai ngulek epo Yesus: "Kain endo sundok ngendikah eka ise masamm ai lumpat Iko; jadi ise po yo anta kuli kain?"Ulek Yesus epo dero: "Aku ngulek epo ikam, se beta-betaioyoli des nampa denia bayu nua, ena Pea Ulun nongos mbo

penunge kemuliaan-Iyo, ikam, yo sundok lumpat Aku, anta tunge lou mbo ombon duo belas penunge nte ngemutus keduo belas suku Israel.²⁹ Ai tongku-tongku ulun yo koe karan-Ku ngendikah lowuiyo, erai buntungiyo song ene lou erai bungtungiyoy bawe, ine umaiyo, pea-pea ene lou umoiyo, anta kuli nua jatus lipat ai anta kuli bolum yo kden.³⁰ Tapi deo ulun yo ono tingen anta jadi sori tingen, ai yo sori tingen anta jadi yo ono tingen."

Chapter 20

¹"Ene low Krajaan Sorga sama kati mpu lou yo ngket ma beta meto ulun nte bgawi mbo kbon anggur iyo. ²Sundok io pekat soal upa diang ulun bgawi ene erai dinar erai olo, io nyuyu dero bgawi mbo kbon anggur iyo. ³Kira-kira jam sie ma io baling ai kito nua ulun-ulun mak yo beay mbo pasar. ⁴Ulek iyo epo dero: Daro ikam epo kbon anggurku ai aku mayar ikam diang upa yo sengkono nau gawi. Pnyundok yo dero malan low. ⁵Kira-kira jam duo blas ai jam tolu duluy io baling nua ai sama kati gawi yo ono nde. ⁶Kira-kira jam limo nayap io baling nua ai ruku nua diang ulun-ulun yo mak, trus ulek iyo epo dero: Ise moko ikam belo keo gawi ka mndo tambus olo? ⁷Ulek dero epo iyo: Koe belo keo ulun yo ngupa kain. Ulek iyo epo dero: Daro ka low ikam epo kbon anggur ku. ⁸Des malom mpu kbon ene ngulek epo mandor iyo: Bnomba ulun-ulun bgawi ene ai bnayar upa dero, mulai yo ket sumba sori sampe yo sumba ono. ⁹Ulet doko dero yo mulai bgawi kira-kira jam limo ai tongku dero nrima erai dinar. ¹⁰Sundok ene ulet low dero yo bgawi ket tla, omoy dero kuli paling roa, tapi tongku kongo dero kuli erai dinar low. ¹¹Des dero nrima ene, dero ngrepengut epo mpu kbon ene. ¹²Ulek iyo: Dero yo sumba sori ene suma bgawi erai jam, iko nyama dero diang kain yo bgawi boyat erai olo pong kono keke langot. ¹³Tapi mpu kbon ene nuing erai kongo ket dero: erai buntung, aku belo di belo adil epo iko. Belo be taka sundok pekat erai dinar erai olo? ¹⁴Alek ka mpun ko trus malan ket ndo; aku kakan mie yo sumba sori endo sama kati ngko. ¹⁵Belo be aku bbas makai mpun ku se sengkono kati ptua kesong ku? Iri be ikam koe aku sawai kesong? ¹⁶Ktine doko ulun yo sori tingen anta jadi yo ono tingen ai ulun ono tingen anta jadi yo sori tingen. ¹⁷Des Yesus kakan malan epo Yerusalem, Io momba dua blas murid-Iyo pinoseing ai ngulek epo dero ela tenga boyan: ¹⁸"Tempo ndo taka malan epo Yerusalem ai Pea Ulun kakan snerah epo pngutok imam-imam diang ahli-ahli Taurat, ai dero kakan ngukum Iyo diang ukum pate. ¹⁹Ai dero anta nyarah Iyo epo bangsa-bangsa yo belo tau se Allah. Apa Io nte uja-uja, nte kurow ai snalib, des olo ktolu Io pinonyuli. ²⁰Ulet ka doko ine pea Zebedeus diang pea-pea iyo ene epo Yesus, laju nyongkop onon-Iyo kakan keo pnindu epo-Iyo. ²¹Ulek Yesus: "Ise pengkakan ko?" Tuing iyo: "Suyu Ko ta, apa keduo pea ku endo kuli tunge anta lang Krajaan-Ko, yo erai mbo tadah sanan Ko ai erai yo tadah sei Ko. ²²Tapi Yesus nuing, ulek Iyo: "Iko belo tau, ise pnindo ko ene. Kuli be iko ngisop ktowong, yo arus isopKu?" Ulek dero epo Iyo: "Kain kuli." ²³Yesus ngulek epo dero: "Ktawong Ku memang anta isop kam, tapi nte tunge ela sanan ai ela sei Ku, Aku belo keo hak mie yo. Ene anta dnine epo ulun-ulun yo sundok pinotoko koe Bapa Ku." ²⁴Kringo ene mara spulu kongo murid yo mak epo duo erai buntung ene. ²⁵Tapi Yesus momba dero laju ngulek: "Ikam tau, se pmerenta-pmerenta bangsa-bangsa mrenta rayat iyo diang prenges ai pngutok-pngutok ene ngenjalan kuasa iyo diang koi koroi epo dero. ²⁶Ena ikam belo di ktine. Ise yo kakan jadi nuon mbo ngket ikam se, moko yo io nte jadi playan kam, ²⁷ai ise-ise yo kakan jadi ulun kinonuon mbo ekang ikam, moko yo io nte jadi batak kam; ²⁸sama kati Pea Ulun ulet belo dikakan nlayan, tapi ube nte nlayan ai nte mie kesong Iyo nte pnous ulun deo. ²⁹Des Yesus diang murid-murid Iyo baling ngket Yerikho, ulun deo nglenduyun nyarak Iyo. ³⁰Keo duo kongo ulun posa yo tunge mbo isan boyan kringo, se Yesus lalo, trus dero momba: "Tuhan, Pea Daud, tkosang ta kain!" ³¹Tapi ulun deo ene ngae dero apa dero suni. Tapi dero tambah ries momba, ulek dero: "Tuhan, Pea Daud, tkosang ta kain!" ³²Laju Yesus nongos ai momba dero. Io ngulek: "Ise ptua kam Oki gawi nte ngkam?" ³³Tuing dero: "Tuhan, apa mato kain kuli meti." ³⁴Jadi Yesus timbul kesong kosang, laju Io mulem mato dero, des ene peles dero kuli meti laju nyarak diang Iyo.

Chapter 21

¹Des Yesus diang murid-murid Iyo dempet se Yerusalem ai ulet mbo Betfage yo keo mbo tunden Zaitun, Yesus nyuyu duo kongo murid Iyo ²diang psan: "Daro ikam epo kampung yo keo mbo onon ikam ene, mne ikam ruku kledai bawe bnolit diang keo anak yo dmpet iyo. Oke kam kledai ene ai noit ine diang anak yo epo Aku. ³Ena keo ulun ngo ikam, ulek kam: Tuhan se yo kakan makai iyo. Io belo anta di ola nempuli yo." ⁴Nau umbang ene ktine apa gnenap firman yo snampe koe nabi: ⁵"Nulek ta epo putri Sion: Neti, Raja ko ulet ngompoh iko, Io belo di koi korong ai nendung kledai, kledai pmoit yo aso burok." ⁶Malan ka doko murid-murid ene ai nggawi kati yo ptua Yesus epo dero. ⁷Dero moit kledai bawe ene diang anak yo, bayu nglapit yo diang diris dero laju Yesus dombo low epo ombon kledai ene. ⁸Ulun deo beta yo keo mbo mne nguar diris dero mbo boyan, keo low yo notok gregey diang daon kayu ai meje yo nyarak boyan. ⁹Ulun deyo yo malan onon Yesus, ai yo nyarak yo ket sori nampa oyon, ulek dero: "Hosana nte Pea Daud, dnine berkat Iyo yo ulet lang karan Tuhan, hosana mbo awa yo paling ombol!" ¹⁰Des Io sumba mbo Yerusalem, gempar ka doko mupus kota ene, ai ulun ngulek: "Ise ulun endo?" ¹¹Ulun deo ene nuing: "Endo doko nabi Yesus ngket Nazaret mbo Galilea." ¹²Laju Yesus sumba epo lang Bait Allah ai ngusa eka ulun yo bdagang mbo natar Bait Allah. Io nelinggang meja-meja awa tukang nganti sen diang pnunge-pnunge penjual dara ¹³ai ngulek epo dero: "Keo tnulis: Lou-Ku nulek lou doa. Tapi ikam nampa yo nte awa ulun akal gramas." ¹⁴Ulet ka doko ulun-ulun posa diang ulun-ulun tempang epo Iyo lang Bait Allah ene, ai dero pkale Iyo. ¹⁵Tapi des imam-imam pngutok diang ahli-ahli Taurat kito musisat-musisat yo tampa Iyo ene ai pea-pea yo momba lang Bait Allah: "Hosana nte Pea Daud!" kesong dero ngriten, ¹⁶laju dero ngulek epo Iyo: "Kringo be Iko ulek pea-pea endo?" Ulek Yesus epo dero: "Aku kringo; belo pini be ikam ngebaca: Ngket bowa taru-taru ai pea-pea yo aso nete Iko sundok nyedia

puji-pujian?"¹⁷ Laju Io ngendikah dero ai malan epo baling se kota epo Betania ai nsan mbo mne.¹⁸ Des aso ma beta desung yo malan mulik epo kota, Yesus kiso sietlaw.¹⁹ Dmpet boyan Io kito tonga ara laju Io ngompoh epo mne, tapi Io belo ruku ise-ise makse daon-daon tingen. Ulek Iyo epo tonga kayu ene: "Iko turai belo anta tau mua oli!" Peles des ene low krep ka doko tonga ara ene.²⁰ Kito nau ene ngrengao murid-murid Iyo, trus ngulek: "Timbe nau tonga ara ene ise moko kolan-kolan krep?"²¹ Tuing Yesus se dero: "Aku ngulek epo ikam, sebata yo ena ikam persaya ai belo kerong-kerong, ikam kuli nggawi lengkat se yo kati gawi Ku epo tonga ara ene, tapi low ena ikam ngulek epo tunden endo: Rengkat ai bturak epo lang tasik! nau umbang ene pasti jadi beta."²² Ai ise-ise ka yo tindu kam lang doa diang persaya beta-beta, ikam pasti nrima yo."²³ Laju Yesus sumba lang Bait Allah, des Io nutui matuk ela mne, ulet imam-imam pngutok diang tuo-tuo bangsa Yahudi ngruku Iyo, peles ngunti: "Diang kuasa ise Iko gwani ene? Ai ise yo mie kuasa ene epo Iko?"²⁴ Tuing Yesus epo dero: "Aku keo pnindu erai pngunti epo ikam ai ena ikam tau nuing epo Aku, Aku ngulek low epo ikam diang kuasa ise Aku nggawi ene."²⁵ Ngket be baptisan Yohanes? Ngket sorga be ngket ulun?" Dero bkesah sama dero, ai ngulek: "Ena taka ngulek: Ngket sorga, Io pasti ngulek: Ena ktine, ise moko ikam belo persaya diang iyo?"²⁶ Tapi ena taka ngulek: Ngket ulun, taka takut diang ulun deo, koe eka ulun ngotus Yohanes ene nabi."²⁷ Bayu dero nuing Yesus: "Kain belo tau." Yesus nuing low epo dero: "Ena ktine, Aku belo ngulek low diang ikam diang kuasa ise Aku nggawi ene."²⁸ Ise san ko nau endo: Keo ulun keo duo pea song, io ulet ngruku pea yo tuo trus ngulek: Peakul malan ka ai bgawi olo ndo mbo kbong anggur.²⁹ Tuing pea ene: O, o, bapa. Tapi io belo malan.³⁰ Laju io nyeruku pea yo kduo, ai ngulek ktine low. Tuing pea ene: Aku belo kakan. Tapi pnyundok iyo noli trus malan low.³¹ Ise lelu dero duo yo ngaya ptua uma yo?" Tuing dero: "Yo sori." Ulek Yesus epo dero: "Aku ngulek epo ikam, sebata yo tukang tindu bea ai lonte yo ono sumba Krajaan Allah se ikam."³² Koe Yohanes ulet nte nutui boyan yo kono nte ngkam, ai ikam belo persaya se iyo. Tapi tukang tindu bea diang lonte persaya diang iyo. Tontan ikam kito, tapi ikam belo tau noli ai belo persaya low diang iyo."³³ Tinompaning pmerawet yo mak. Keo mpu tana muka kbong anggur ai nampa pagar lekum. Io ngali luang nte awa mia anggur diang nampa pmeo awa ndurung lang kbong ene. Laju io memesewa kbong ene epo penggawi-penggawi kbong laju io se malan epo dnia yo mak.³⁴ Des duni musim panen, io nyuyu batak-batak iyo nte ngruku penggawi-penggawi ene nte nrima asil yo nte iyo.³⁵ Tapi penggawi-penggawi nangop batak-batak iyo ene: dero mupuk yo erai, ngempate yo mak ai nurak yo mak low diang batu.³⁶ Laju mpu tana ene nyuyu low batak-batak yo mak, deo se yo tla, tapi pengkono dero sama kati tman-tman dero ene.³⁷ Pnyundok yo io nyuyu pea se ngruku dero, ulek iyo: Ena pea ku pasti dero takut.³⁸ Tapi des penggawi-penggawi ene kito pea iyo ene, dero bkesah sama dero: Io ene ahli waris, alo taka ngempate iyo, apa warisan ene nte taka.³⁹ Dero nangop io laju nurak io epo baling se kbong anggur ene laju ngempate iyo.⁴⁰ Jadi ena mpu kbong anggur ene ulet, ise yo anta gawi iyo epo penggawi-penggawi ene?"⁴¹ Ulek dero epo Iyo: "Io anta mrindas ulun-ulun triaw gawi ene ai kbong anggur ene anta snewa epo penggawi-penggawi yo mak, yo kakan nyerah hasil sampe des jman iyo."⁴² Ulek Yesus diang dero: "Belo be ikam pini baca lang Kitab Suci: Batu yo noding koe tukang-tukang bangunan sundo jadi batu penjuru: hal kjadian nget pihak Tuhan, ene hal yo ajaib mbo mato taka."⁴³ Koe ene, Aku ngulek epo ikam, se Krajaan Allah anta nalek ngket ikam ai anta dnine epo bangsa yo ngasil bua Krajaan ene.⁴⁴ Ai ise-ise yo toyak mitek batu ene, io pasti tempur ai ise-ise yo kono sengkinan batu ene, io tme."⁴⁵ Des imam-imam pngutok diang ulun-ulun Farisi kringo pemerawet-pemerawet Yesus, dero tau, se dero ene yo pinotua koe Iyo.⁴⁶ Laju dero bkomer nte nangop Iyo, tapi dero takut diang ulun deo, koe ulun deo ene ngotus Iyo ene nabi.

Chapter 22

¹Laju Yesus bsara low lang pmrawet epo dero: ²"Nau umbang Krajaan Sorga sama kati erai kongo raja, yo nampa ungan nte pea-iyu. ³Io nyuyu batak-batak-iyu ngirak ulun-ulun yo sundok pnakot epo ungan ene, tapi ulun-ulun ene belo di kakan ngompoh. ⁴Io nyuyu nua batak-batak yo mak, pakot-iyu: Nulek beta deh epo ulun-ulun yo pnakot ene: Se beta-beta-iyu okan singkap, sundok sdia-ku, lmbu-lmbu song ai pnykamu-ku sundok sinomble; eka ene sundok sinodia, ulet aut epo kuman nyingkap mbo ungan endo. ⁵Tapi ulun-ulun yo pnakot ene belo di kakan nyanda; keo yo malan epo umo dero, keo yo malan epo ngurus penyetaket dero, ⁶ai yo mak nangop batak-batak-iyu ene, nguraw ai ngmpate dero. ⁷Jadi mara roa ka doko raja ene, laju nyuyu pasukan-iyu epo daro nte ngmpate pngmpate-pngmpate ene ai nuna kota dero. ⁸Sundok ene io ngulek epo batak-batak-iyu: Okan singkap nte ungan kawen sundok sinodia, tapi ulun-ulun yo pnakot nde belo di snghkono nte ene. ⁹Koe ene malan aut epo ensangan-ensangan boyan ai pnakot beta tongku ulun yo ruku kam lane epo kuman nyingkap nte ungan kawen ene. ¹⁰Jadi malan beta batak-batak ene ai dero ngumpul eka ulun yo ruku dero mbo boyan, ulun-ulun triaw ai ulun-ulun buen, sampe ponu doko belawang awa kuman nyingkap ungan kawen ene diang peri. ¹¹Des raja ene sumba nte nyuruku peri-peri ene, io kito erai kongo ulun yo belo makai pakaian ungan. ¹²Io ngulek epo-iyu: O eraibuntung, ktimbe moko iko sumba epo dido belo nyua pakaian ungan? Tapi ulun ene suni-suni ka. ¹³Laju raja ene ngulek epo batak-batak-iyu: Bolit ka botis kayang-iyu ai tebir ka ulun ene epo lang seom yo seom ji, mbo lane doko anta keo tontoi ai kukut ngrgigep. ¹⁴Koe deo yo bnomba, tapi kurang yo pnili. ¹⁵Sundok ene malan ka ulun-ulun Farisi; dero brondeng ktimbe dero kuli nangop Yesus diang penyekunti. ¹⁶Dero nyuyu murid-murid dero diang ulun-ulun Herodian ngunti epo-Iyo: "Guru, kain tau, Iko ene ulun jujur nutui matuk boyan Allah ai Iko belo di takut se ulun ise ka, koe Iko belo di nondek Iko se. ¹⁷Ulek ta epo kain ktimbe san-Ko: Kate be belo be mayar bea epo Kaisar?"¹⁸ Tapi Yesus tau ktriaw kesong dero ene laju ngulek: Ise moko ikam nyoba Aku, o ulun-ulun ungka ungke di tau? ¹⁹Pkelak ta epo Aku mato sen nte bea ene." Dero moit sen dinar epo-Iyo. ²⁰Jadi Io ngunti epo dero: "Gambar ai tulisan ise endo?" ²¹Tuing dero: "Gambar ai tulisan Kaisar." Laju ulek Yesus epo dero: "Dnie ko epo Kaisar ise yo arus die kam epo Kaisar ai epo Allah ise yo arus die

kam epo Allah." ²²Kringo ene eran doko dero ai ngndikah Yesus laju malan. ²³Des olo ene ulet ka epo Yesus tenu-tenu kongo ulun Saduki, yo keo pentau, se belo keo pngnyuli. Dero ngunti epo-Iyo: ²⁴"Guru, Musa ngulek, se ena ulun mate diang belo keo nape pea, eraibuntung-iyu arus kawen diang bawe-iyu ene ai nngkuat upus nte eraibuntung-iyu ene. ²⁵Endo ekang kain keo turu kongo ulun eraibuntung. Yo tla kawen, tapi sundok ene mate. Jadi koe io belo keo upus, io nape bawe-iyu ene nte eraibuntung-iyu. ²⁶Ktine low yo kduo ai yo ktolu sampe diang yo kturu. ²⁷Jadi pngabis-iyu, sundok dero eka, bawe ene mate low. ²⁸Ise ngket turu kongo ene yo jadi song bawe ene des olo pngnyuli? Koe dero eka sundok nmbawe io. ²⁹Yesus nuing dero: "Ikam tang, koe ikam belo tau Kitab Suci diang kuasa Allah! ³⁰Koe des olo pngnyuli ulun belo di kawen ai belo di knawen tapi bolum kati mlaekat mbo sorga. ³¹Tapi nau otang pngnyuli ulun-ulun mate belo be ikam ngmbaca ise firman Allah, des io ngulek: ³²Aku doko Allah Abraham, Allah Ishak ai Allah Yakub? Io makse di Allah ulun mate, tapi Allah ulun bolum." ³³Ulun deo yo kringo ene eran beta diang tutui batuk-Iyo ³⁴Des ulun-ulun Farisi kringo, se Yesus sundok nampa ulun-ulun Saduki ene nyruni, bkumpul ka doko dero ³⁵ai erai kongo ngket dero, erai kongo ahli Taurat, ngunti nte nyoba Io: ³⁶"Guru, ukum mone yo paling ombo lang ukum Taurat?" ³⁷Tuing Yesus epo-iyu: "Tinongkosang beta Tuhan, Allah-ko, diang bol-bol kesong-ko ai diang bol-bol eka pnymbolum-ko ai diang bol-bol eka kno buen-ko. ³⁸Ene doko ukum yo paling ombo ai yo tla. ³⁹Ai ukum yo kduo, yo sama diang ene, yo doko: Tinongkosang ko sama sama ulun sama kati kompu tonga ko se. ⁴⁰Mbo kduo ukum ene ka doko betondok eka ukum Taurat ai kitab nabi-nabi. ⁴¹Des ulun-ulun Farisi desung bkumpul, Yesus nguntin epo dero, ulek-Iyo: ⁴²"Ise san kam nau otang Mesias? Pea ise Io ene? Ulek dero epo-Iyo: "Pea Daud. ⁴³Ulek-Iyo epo dero: "Ena ktine, ktimbe moko Daud koe ayak Roh kate momba Io Tuan-iyu, des io ngulek: ⁴⁴Tuhan sundok bsara epo Tuan-ku: Tunge ka mbo tadah sanan-Ku, sampe bali-bali-Ko payak-Ku mbo iwat botis-Ko. ⁴⁵Jadi ena Daud momba Io Tuan-iyu, bahe be Io pea-iyu low?" ⁴⁶Ndok belo erai kongo ulun yo kuli nuing nte-Iyo ene, ai ngket olo ene ndok belo erai kongo ulun oli yo ronun ngunti ise-ise epo-Iyo.

Chapter 23

¹Koe ene Yesus ngulek epo ulun deo ai epo murid-murid Iyo, ulek Iyo: ²"Ahli-ahli Taurat diang ulun-ulun Farisi sundok tunge mbo pnunge Musa. ³Koe ene naya diang gnawi ise yo bnatur koe dero epo ikam, tapi nang ikam nyarak ise yo gawi dero, koe dero nutui matuk tingen tapi belo di nglakuiyo. ⁴Dero molit pnyekoit-pnyekoit boyat, trus mayak ombon pluko ulun, tapi dero se belo kakan mulem yo. ⁵Eka gawi yo nlaku koe dero ene apa eti ulun tingen; dero makai tali sembayang yo sae ai jumbai yo anjang; ⁶Dero tuju tunge mbo awa yo paling kinonuon lang ungan ai ela ono tingen ena mbo lou sembayang; ⁷Dero gawal ena pkombo ulun ela pakot ai gawal ena bnomba Guru. ⁸Tapi ikam, nang sampe nulek Guru; koe Guru kam erai bute ai ikam eka ene erai buntung. ⁹Ai ikam nang momba ise-ise low bapa mbo dnia endo, koe Bapa kam erai bute, yo ene Iyo yo keo mbo Sorga. ¹⁰Nang low ikam nulek se pngutok, koe erai bute pngutok kam, yo ene Mesias. ¹¹Ise-ise ikam yo paling olay, moko io yo nte jadi playan kam. ¹²Ai ise-ise yo pkombo iyo se, io anta pinokiwa ai ise yo mekiwa yo se, io anta pinokombo. ¹³Sesa beta anta ikam, o ahli-ahli Taurat diang ulun-ulun Farisi, o ulun-ulun ungka ungke tau, koe ikam nokom jawong-jawong Krajaan Sorga mbo onon ulun. Koe ikam se belo sumba ai ikam ngaur nte dero yo bkomer kakan sumba. ¹⁴Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke tau, koe ikam ngakal balu-balu ai ikam nipu ngakal mato ulun diang doa yo anjang-anjang. Koe ene pasti ikam nrima ukuman yo paling boyat. ¹⁵Sesa beta anta ikam, o ahli-ahli Taurat diang ulun-ulun Farisi, o ulun-ulun ungka-ungke di tau, koe ikam blayar ngentas tasik ai bange epo mone-mone mbo tana ombo, nte naket erai kongo tingen nte lumbat agama kam ai des io sundok lumpat, ikam nampa iyo jadi ulun nraka, yo duo lipat triaw se ikam ¹⁶Sesa beta anta ikam, o pngutok-pngutok posa, yo ngulek: Berputus koe Bait Suci, bputus ene belo keo jodo; tapi bputus koe mas Bait Suci, berputus ene ngemereket. ¹⁷O ikam ulun-ulun bungang ai ulun-ulun posa, ise yo pawak penting, emas be ena belo Bait Suci yo mekudus emas ene? ¹⁸Berputus koe mezbah, bputus ene belo keo jodo; tapi bputus koe persembahan yo keo mbo ban iyo, berputus ene ngemereket. ¹⁹O ikam ulun-ulun posa, ise yo pawak penting, persembahan be ena belo mezbah yo mkudus persembahan ene? ²⁰Koe ene ise yo berputus koe mezbah, io bputus koe mezbah ai low diang eka yo keo pnayak ban ene. ²¹Ai ise yo berputus koe Bait Suci, io bputus koe Bait Suci diang epo Iyo low, yo nongos mbo mne. ²²Ai ise yo berputus koe sorga, io bputus koe tahta Allah ai low koe Iyo, yo nongos ombon yo. ²³Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, Koe perpuluhan ngket slase, adas manis ai jinten bayar kam, tapi yo paling penting lang ukum Taurat belo di snanda koe kam, yo ene: adil diang bolum bako tengkosang ai stia. Yo erai gnawi tapi yo mak nang dnukah. ²⁴O ikam pngutok-pngutok posa, kiyongo yo keo lang pngisop kam noding, tapi onta yo keo lang ne tolon kam. ²⁵Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, koe ktowong diang pinggan tinombrese ela baling yo tingen koe kam, tapi ela dalom yo ponu diang ako dalus ai mrangghah. ²⁶O ulun Farisi yo posa, tinombrese ile ela dalom ktowong ene, pasti ela baling yo brese low. ²⁷Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, Koe ikam sama kati kubur yo ncet bura, ngket baling nau yobrese yo, tapi ela dalom yo ponu diang tulang-tulang ai deo masam mrota. ²⁸Ene low ikam, ela baling nau yo kono ela mato ulun, tapi ela dalom kam ponu diang ungka-ungke di tau ai kteriaw. ²⁹Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, koe ikam nengkuat kubur nabi-nabi ai nengkuen tugu ulun-ulun saleh ³⁰ai ngulek: Ena kain bolum jman itak kakah kain, kain belo anta lumpat diang dero ngempate nabi-nabi ene. ³¹Tapi diang ktine ikam ngulek nte ngkam se, se ikam ene upus pngempate nabi-nabi ene. ³²Jadi, tinomponuka low gawi gata itak kakah kam! ³³O ikam nipo-nipo, o ikam upus nipo muro! Timbe nau ikam kate ngidar ngket ukum nraka? ³⁴Koe

ene, eti ka, Aku nyuyu epo ikam nabi-nabi, ulun-ulun tau ba ai ahli-ahli Taurat: tenga ngket dero anta pate kam ai snalib koe kam, yo mak knesa koe kam mbo lou-lou sembayang kam ai kurow kam ngket kota epo kota, ³⁵apa ikam nanggung ukuman pngerudak daya ulun-ulun belo sala mulai ngket Habel, ulun kono ene, sampe epo Zakharia pea Berekhya, yo pate kam mbo ekang awa kudus ai mezbah. ³⁶Aku ngulek epo ikam: sebeta-beta yo eka-eka endo tnanggung koe pokan endo!"³⁷"Yerusalem, Yerusalem, iko yo ngempate nabi-nabi ai nurak diang batu ulun-ulun yo snuyu epo ikam! Bjuli-juli Aku ngeno kakan ngumpul pea-pea kam, sama kati tino piak ngumpul anak-anak iyo iwat olar iyo, tapi ikam belo kakan. ³⁸Eti ka lou kam endo anta dnikah ai jadi luway. ³⁹Ai Aku ngulek epo ikam: Ngket tempo ndo ikam belo anta kito Aku oli, sampe ikam ngulek: Kuli berkat diko Iyo yo ulet lang karan Tuhan!"

Chapter 24

¹Sundok ene Yesus baling ngket Bait Allah, laju malan. Murit-murit-Iyo ulet nutui tadah nau umbang Bait Allah. ²Io ngulek epo dero: "Ikam kito eka-eka ene? Aku ngulek epo ikam, sbeta yo ndok belo erai batu mbo mndo yo aso toro bpayak ban batu yo mak; eka-eka ene kakan pinorata diang tana."³Des Yesus tunge nyderai ela tngglung Zaitun, ulet murit-murit-Iyo epo-Iyo nte bkesah surah diang Io. Ulek dero: "Ulek-Ko tah epo kain, Kola ene trjadi ai ise pleta pngulet-Ko ai pleta pnyundok dnia?" ⁴Tuing Yesus epo dero: "Jaga-jaga ka ikam apa nang keo ulun yo nampa ikam tang! ⁵Koe deo ulun anta ulet diang makai karan-Ku ai ngulek: Aku endo Mesias, ai dero anta nampa tang deo ulun. ⁶Ikam anta kringo rtimpok oyon prang ai dolit-dolit kabar se prang, beta ktine jaga-jaga ka nang ikam belo kturoh; Koe eka-eka ene mamang arus jadi, tapi ene belo pian pnyundok iyo. ⁷Koe bangsa yo erai anta bprang nglawan bangsa yo mak, ai krajaan nglawan krajaan. Anta keo jman lau diang klakui mbo mone2 awa. ⁸Tapi eka-eka ene bayu pnindu kssa ulun onon se jaman bayu. ⁹Des jman ene anta ikam snrah nte kurow, ai ikam anta pnate diang kono knekei koe eka bangsa koe leka karan-Ku, ¹⁰ai deo ulun anta tbalik belo prsaya, diang dero bako srah ai bako kekei. ¹¹Deo nabi plsu anta nyoret ai nampa tang deo ulun. ¹²Koe makin deo ulun yo belo nyanda hukum Tuhan, moko ene deo ulun anta belo keo kanam kosang se erai-erai. ¹³Tapi ulun yo btahan sampe pnyundok iyo, anta sinolamat. ¹⁴diang Injil Krajaan endo anta knabar epo pupus dnia nte saksi epo eka bangsa, sundok ene bayu sampe pnyundok iyo."¹⁵"Jadi ena ikam kito ulun yo Pngempate prnges akat mbo awa kudus, kati pirman yo keo tnulis koe nabi Daniel. (pesan nte yo ngmbaca endo: apa kinonanam beta-beta ¹⁶des jman ene, ulun-ulun yo mbo Yudea arus makat epo tunden. ¹⁷Ulun yo desung mbo awa beseriut ela ombon sapo nang ka yo diwa nte ngalek kakas keke ngket lang lou iyo, ¹⁸ai ulun-ulun yo desung ela umo nang ka io uli nte ngalek diris laung iyo, ¹⁹Belo kua beta yo bang bawe yo desung kbuntung diang desung nete pea des jman ene. ²⁰Bdoa ikam, apa des jman ikam buyo belo montuk diang jman dnia roni ai belo montuk diang olo Sabat. ²¹Koe des jman ene anta tkono ksa kurow yo deras, yo belo pini tkono ngket tla dnia keo sampe tempo endo ai belo anta keo tkono ktine oli. ²²Ai ena ka jman yo belo pinokile, moko ene eka yo bolum belo anta keo yo slamat; tapi leka ulun-ulun yo sundok pnili, jman ene anta pinokile. ²³Des jman ene ena ulun ngulek epo ikam: eti ta, Mesias keo mbo mndo, keo mbo mnduh, nang ikam prsaya. ²⁴Koe Mesias-mesias plsu ai nabi-nabi plsu anta nyoret, ulak dero anta nampa pleta-pleta yo tau te nembengong diang mujisat-mujisat, ena ka montuk sngkono, dero nampa tang ulun-ulun yo sundok pnili ene lou. ²⁵Knanam kam buen-buen, Aku sundok mere ono aut epo ikam"²⁶Jadi, ena keo ulun yo ngulek epo ikam: eti kam, Io keo mbo tana keke sae, nang ikam epo lane; ena belo: eti kam, Io keo lang duang, nang beta ikam prsaya. ²⁷Koe sama kati ilap yo bbeap ngket tadah timur nylalit pa yo sampe epo barat, ktine lou anta pngulet Pea Ulun. ²⁸Mbo mone keo antu boto, mbo mne deo mpulu pnguman antu boto ngurop."²⁹Belo ola ngket jman knurou ene, mato olo jadi seom ai bulan belo keo pa' Bintong-bintong toyak ngrpotop ngket langit ai kuasa-kuasa ngket langit skukui. ³⁰Des jman ene anta melak pleta Pea Ulun mbo langit ai eka bangsa mbo dnia anta nangis nungul. Dero kito se Pea Ulun ene ulet mbo ombon jaun mbo langit diang eka kuasa ai kmulia-Iyo. ³¹Ai Io anta nyuyu baling mlekat-mlekat-Iyo ulak nyiup temburi yo ries oyon iyo laju dero ngumpul ulun-ulun yo sundok lang pili-Iyo ngket opat tadah trojok dnia, ngket tompak langit erai epo tompak langit yo mak. ³²Alek kam ptutui batuk ngket pmrawet nau umbang tonga ara ene: Ena ka grgei-grgei mulai loma ulak mulai ktaruk, ikam tau se jman dnia langot sundok dmpet. ³³Ktine lou ena ikam kito eka-eka endo, apa ikam tau se jman ene sundok dmpet, sundok mbo ela onon jawong. ³⁴Aku ngulek epo ikam: Sbeta yo pokan endo belo anta mapos, onon se eka-eka ene trjadi. ³⁵Langit ai dnia anta mapos, tapi pngesah-Ku belo anta mapos"³⁶Tapi olo ise diang jman ise ene ndok belo erai ulun yo tau, mlekat-mlekat mbo sorga belo tau, ktine lou Pea, pulun Bapa bute yo tau."³⁷Koe kati umbang des mbo jman Nuh, ktine lou umbang yo anta des pngulet Pea Ulun. ³⁸Koe kati umbang nau dero des onon se owa nyelop dnia ene kuman ai ngisop, kawen ai ngawen, sampe mbo olo nte Nuh sumba epo lang kpal olai, ³⁹ai dero belo tau ise-ise, onon se danum nyelop dnia ene ulet laju mkabis dero eka, ktine lou nau umbang yo anta des pngulet Pea Ulun. ⁴⁰Des jman ene ena keo duo kongo ulun mbo umo, yo erai kongo noit, yo erai kongo yo tenape; ⁴¹ena keo duo kongo ulun bawe desung mutar batu pnggiling, yo erai kongo yo noit, yo erai yo tenape. ⁴²Koe ene jaga-jaga ikam, koe ikam belo di tau des olo ise Tuhan kam ulet. ⁴³Apa ikam tau endo: Ena mpu lou tau des jman ise mbo malom pngako kakan ulet, pasti io bjaga-jaga, belo anta mie boyan nte lou io kono uguh. ⁴⁴Koe ene, moko yo ikam briga-iga, koe Pea Ulun ulet mbo des jman yo ikam belo ngira. ⁴⁵"Ise ka batak yo stia ai buen akal? io ene yo nengkat koe mpu lou nte pngutok batak-batak yo mak, nte makan dero mak ene des jman iyo. ⁴⁶Empu pngego batak ene des mpu lou ulet, kito yo desung nggawi tugas iyo. ⁴⁷Aku ngulek epo ikam: Sbeta iyo anta mpu lou ene kakan ngengkat io nte jadi tukang meti noto nau pngeka pngkeo iyo. ⁴⁸Tapi ena ka batak ene triau akal ulak ngontus lang kesong iyo: ⁴⁹Mpu lou belo di ulet-ulet, laju yo mulai ngntu batak-batak yo mak ai kuman ngisop diang ulun-ulun tuju mauk, ⁵⁰moko ene

mpu lou ene anta ulet mbo olo yo belo lang kira batak ene, ai mbo jman yo belo di tnoan iyo, ⁵¹batak ene kono ntu ndok kesong sori koe mpu lou, laju moding epo awa ulun-ulun mnapi. Lane dero nangis nontoi diang ngrgigep kukut."

Chapter 25

¹Des ene nau umbang Krajaan Korga sama kati spulu bawe ngelok, yo ngalek plita-iyu ai malan epo ngruku pnganten song. ²Limo dero yo bungang ai limo dero yo pintar. ³Bawe ngelok yo bungang ene moit plita-iyu, tapi belo di moit lnga, ⁴tapi bawe ngelok yo pintar ene moit plita-iyu diang lnga lang jbul dero. ⁵Tapi koe pnganten ene ola belo di ulet-ulet lou, nyantuk ba dero laju turui. ⁶Des tenga malom dingo ka doko oyon ulun momba: Pnganten ulet! Sinoruku ta io! ⁷Bawe ngelok ene eka uat laju ngraduh plita dero. ⁸Bawe ngelok yo bungang ene ngulek epo bawe ngelok yo pintar: Bnagi kain idi-idi lnga kam ene, koe plita kain lnsop. ⁹Tapi tuing bawe ngelok yo pintar ene: Belo, nindo belo puli nte kain ai nte ngkam. Ale ikam malan epo yo ngnjual lnga, boli ka lane. ¹⁰Tapi, des dero aso malan nte moli-iyu, ulet ka doko pnganten ene ai dero yo sundok ber iga-iga sumba sama-sama diang io epo blawang awa ungan kawen, laju jawong tnokom. ¹¹Ulet lou bawe ngelok yo mak ene ai ngulek: Tuan, tuan ingkang tah nte kain jawong! ¹²Tapi io nuing: Aku ngulek epo ikam, se beta-beta-iyu aku belo di tau se ikam. ¹³Koe ene, bjaga-jaga doko, koe ikam belo di tau olo ai anta des-iyu. ¹⁴Koe nau umbang Krajaan Sorga ene sama kati ulun yo kakan bju epo baling se ja, yo momba batak-batak io ai nape pngkeo-iyu epo dero. ¹⁵Erai kongo die io limo talenta, erai kongo nua duo ai erai kongo yo mak nua erai, tongku-tongku dero kati pnglian dero, laju io bju. ¹⁶Laju malan ka doko batak yo kuli limo talenta ene. io staket diang sen ene laju io kuli untung limo talenta. ¹⁷Batak yo kuli duo talenta ene, nggawi ktine lou untung io duo talenta. ¹⁸Tapi batak yo kuli erai talenta ene, malan epo nampa luang lang tana laju ngona sen tuan-iyu ene. ¹⁹Ola sundok ene uli ka doko tuan batak-batak ene laju britung diang dero. ²⁰Batak yo kuli limo talenta ene ulet ai io moit untumg limo talenta, ulek-iyu: Tuan, limo talenta yo tnape epo aku; eti ko ta, aku kuli untung limo talenta. ²¹Ulek tuan ene epo-iyu: Buen beta yo gawi ko ene, oh batak ku yo buen ai setia; iko sundok stia lang gawi yo idik, aku anta mie epo iko gawi yo olai. Sumba ka ai lumpat ka lang pngego tuan ko. ²²Laju ulet lou doko batak yo kuli duo talenta ene, ulek io: Tuan, duo talenta tuan nape epo aku; eti ko ta, aku sundok kuli untung duo talenta. ²³Ulek tuan-iyu ene epo-iyu: Buen beta gawi ko ene, o batak ku yo buen ai stia, iko sundok stia lang gawi yo idik, aku anta mie epo iko gawi yo olai. Sumba ka diang lumpat ka lang pngego tuan ko. ²⁴Jadi ulet lou doko batak yo kuli erai talenta ene ai ngulek: Tuan, aku tau se tuan ene ulun rusi yo ngutik mbo awa yo tuanbelo di mewet ai yo ninduk mbo awa io belo ngulo. ²⁵Koe ene aku takut ai malan aku epo ngona talenta tuan ene lang tana: Nndo, trima ka mpun tuan! ²⁶Tuing tuan-iyu ene: o iko, batak yo triaw ai bontul, iko sundok tau, se aku ngutik mbo awa aku belo di mewet ai ninduk ngket awa aku belo di ngulo? ²⁷Koe ene arus yo sen ku ene die ko epo ulun yo tukang naket sen diang sen, apa ena aku uli aku nrima yo diang untung yo. ²⁸Koe ene alek ka talenta ene ngket io ai die ka epo ulun yo keo spulu talenta ene. ²⁹Koe tongku ulun yo keo, epo io anta dne, apa pngkeo io mroa. Tapi ise yo belo keo, ise ise yo keo mbo io anta nalek ngket io. ³⁰Noding ka batak yo belo keo jodo ene epo lang seom yo seom ji. La lane keo tangis tontoi ai kukut ngrgigep. ³¹Ena Pea Ulun ulet lang kmulia-iyu ai eka mlekat sama-sama diang io, jadi io anta tunge ban takhta kmulia-iyu. ³²Laju eka bangsa anta knumpul onon-iyu ai io anta nyeing dero ngket sama dero, sama kati gmbala nyeing domba ngket bembe, ³³ai io anta mayak domba-domba tadah sanan-iyu, ai bembe-bembe ene tadah sei-iyu. ³⁴Ai Raja ene anta ngulek epo dero yo tadah sanan-iyu: Dido, ikam yo dne berkati koe Bapa-Ku, trima ka Krajaan yo sundok sinodia nte kam ngket tla dnia tnampa. ³⁵Koe des Aku slau, ikam mie Aku kuman; des Aku krengan, ikam mie Aku danum; des Aku nyumba-nyumba, ikam mie Aku awa nongos; ³⁶des Aku bla'i, ikam moe Aku diris; des Aku kroton, ikam ngawat Aku; des Aku nukum, ikam nuntun Aku. ³⁷Ulun-ulun yo kono ene nuing io, ulek dero: Tuhan, des mbe kain kito Iko slau ai kain mie Iko kuman, ai krengan trus kain mie Iko ngisop? ³⁸Des mbe kain kito Iko kati ulun nyumba-nyuma, ai kain mie Iko awa nongos, ai bla'i jadi kain mie Iko diris? ³⁹Des mbe kain kito Iko kroton ai nukum lang pnjara ai kain nuntun Iko? ⁴⁰Raja ene nuing dero: Aku ngulek epo ikam, se beta yo eka yo gawi kam nte erai kongo ngket erai buntung-Ku yo paling hina endo, ikam sundok nggawi yo nte Oki. ⁴¹Ai io anta ngulek lou epo dero yo ngket tadah sei-iyu: makat ngket onon-Ku, oh ikam ulun-ulun yo okan pator sumpah, makat epo lang api yo sundok sinodia nte iblis ai mlekat-mlekat io. ⁴²Koe des Aku slau, ikam belo mie Aku kuman; des Aku krengan, ikam belo mie Aku ngisop; ⁴³Des Aku kati ulun nyumba-nyumba, ikam belo mie Aku awa nongos; des Aku bla'i, ikam belo mie Aku diris; des Aku kroton ai nukum ikam belo nuntun Aku. ⁴⁴Laju dero low anta nuing io, ulek dero: Tuhan, des mbe kain kito Iko slau, ai krengan, ai kati ulun nyumba-nyumba, ai bla'i ai kroton ai nukum ai kain belo di ngawat Iko? ⁴⁵Trus io nuing dero: Aku ngulek epo ikam eka gawi gata yo belo gnawi koe kam nte ulun yo paling ina endo, ikam belo nggawi yo low nte Oki. ⁴⁶Ai dero anta sumba epo awa knesa yo kden, tapi ulun yo kono ene epo lang bolum yo kden."

Chapter 26

¹Des Yesus sundok diang eka tutuy batuk Iyo ene, io ngulek epo murid-murid Iyo: ²"Ikam tau, se duo olo aso kakan neraya Paskah, Des ene Pea Ulun snerah nte salib." ³Des jman ene bkumpul ka doko imam-imam pngutok diang ulun tuo bangsa Yahudi ela istana Imam Olay yo keo karan se Kayafas, ⁴ai dero ngrondeng ptua dat nte nangop Yesus ai nte ngempate Iyo. ⁵Tapi dero ngulek: "Nang des prayaan, apa belo timbul rame mbo ekang ra'yat." ⁶Des Yesus keo mbo Betania, mbo lou Simon yo keo roton kodong, ⁷ulet ka erai kongo bawe nyuruku Iyo moit erai jbul marmer batok lenga kewo yo larang. Lenga ene tota iyo ombon utok Yesus, yo aso desung tunge kuman. ⁸Kito ene murid-murid ene dat san ai ngulek: "Ise jodo

ksa se endo? ⁹ koe lenga ene dapet jnual diang uman larang ai sen yo dapet nte die epo ulun-ulun kao. ¹⁰Tapi Yesus tau kno dero laju ngulek: "Ise moko ikam nyusah bawe endo? Koe iyo sundok nggawi yo buen epo Aku. ¹¹Koe ulun-ulun kao majak keo diang ikam, tapi Aku belo di dor sama-sama diang ikam. ¹²Koe diang nota lenga ene epo kompu-Ku, io sundok ngraduh nte nglowong-Aku. ¹³Aku ngulek epo ikam: Sebata yo ela mone ka Injil endo snampe mbo mupus dnia, ise nau gawi yo endo anta nulek low nte ngno iyo. ¹⁴Ngket ene malan ka erai kongo ngket duo blas murid ene, yo nan karan se Yudas Iskariot, epo imam-imam pngutok. ¹⁵Io ngulek: "Ise yo kakan die kam epo aku, apa aku nyerah Io epo ikam?" Dero mayar tolu pulu perak epo iyo. ¹⁶Mulai ngket ene io meto jman yo buen nte nyerah Yesus. ¹⁷Des olo tla ngket olo raya roti belo bragi, ulet ka murid-murid Yesus epo Iyo ai ngulek: "Ela mone ptua Ko kain ngraduh awa nte perjamuan Paskah nte Ngko?" ¹⁸Tuing Yesus: "Malan ta epo kota nyruku erai kongo ulun ai ulek epo iyo: Psan Guru: des yo nte Oki sundok dmpet; lang lou ko doko Aku kakan ngraya Paskah diang murid-murid Ku." ¹⁹Laju murid-murid ene nglaku ise yo suyu Yesus epo dero ai ngraduh nte Paskah. ²⁰Des olo sundok malom, Yesus tunge kuman sama-sama diang duo blas murid ene. ²¹Ai des dero desung kuman, Io ngulek: "Aku ngulek epo ikam, sebata-beta yo erai kongo ngket ikam anta nyerah Aku." ²²Ai diang kesong nyoru dero sengkelang ngulek epo Iyo: "Mak se aku be ene, Tuhan?" ²³Io nuing: "Iyo yo sama-sama diang aku yo nyoso kayang iyo lang pinggan endo, io ene doko yo anta nyerah Aku. ²⁴Pea ulun memang anta brangkat kati yo sundok tnulis nau umbang Iyo, tapi jadi sesa beta ulun yo koe iyo Pea ulun ene snerah. Aso buen nte ulun ene ena io snon belo kinomekus skali." ²⁵Yudas, yo kakan nyerah Iyo ene nuing, ulek iyo: "Makse aku be, Guru?" Ulek Yesus epo iyo: "Iko sundok ngulek yo." ²⁶Ai des dero desung kuman, Yesus ngalek roti, bdoa, mrinsi-mrinsi iyo laju mie iyo epo murid-murid Iyo ai ngulek: "Aleka ta laju nokan, endo doko kompu-Ku." ²⁷Sundok ene Io ngalek ktowong, ngulek sukur laju mie iyo epo dero ai ngulek: "Nisop ta, ikam eka-eka, ngket ktowong endo. ²⁸Endo doko daya-Ku, daya pemekat, yo tnudak nte ulun deo nte ngampun dosa. ²⁹Tapi Aku ngulek epo ikam: mulai ngket tempo ndo Aku belo anta ngisop oli asil tonga anggur endo sampe des olo Aku ngisop yo, yo ene yo bayu, sama-sama diang ikam lang Krajaan Bapa-Ku." ³⁰Des sundok slegu legu pujian, malan ka Yesus diang murid-murid Iyo epo Tenggelung Zaitun. ³¹Ngulek ka doko Yesus epo dero: "Malom ndo ikam eka jadi bkukuy ba iman kam koe Aku. Koe keo tnulis: Aku anta ngempate gembala ai kawan domba ene anta jadi bambur. ³²Tapi des Aku sundok nyuli, Aku ono se ikam epo Galilea." ³³Petrus nuing Iyo: "Tontan dero eka bkukuy iman yo koe Iko, aku belo anta." ³⁴Yesus ngulek epo iyo: "Aku ngulek epo iko, sebata yo malom ndo, onon piak sluat, iko sundok belo ngaku se Aku tolu derang." ³⁵Ulek Petrus epo Iyo: "Tontan ko aku arus mate sama-sama diang Iko, aku belo anta belo ngaku se Iko." Eka murid yo mak ngulek ktine low. ³⁶Sampe ka doko Yesus diang murid-murid Iyo mbo awa nan karan se Getsemani. Laju Io ngulek epo murid-murid Iyo: "Tunge ta mbo mendo, Aku epo menduh ile nte bdoa." ³⁷Ai Io moit Petrus diang duo pea Zebedeus lumpat Iyo. Mulai ka doko Io keo kanam nyoru ai ngrikitik, ³⁸laju ulek Iyo epo dero: "Kesong-Ku nyoru beta, kati kakan mate kanam iyo. Nongos ta mbo mendo ai jaga-jaga diang Aku." ³⁹Io wensut epo ono idi-idi, laju nyongkop ai bdoa, ulek-Iyo: "O Bapa-Ku, ena kate, koe ka ktowong endo oro ngket Aku, tapi nang kati yo ptua-Ku, tapi kati yo ptua-Ko." ⁴⁰Sundok ene Io mulik epo murid-murid Iyo ene, ai krapet dero desung turui ba. Ai Io ngulek epo Petrus: "Belo be iko klian jaga-jaga erai jam diang Aku?" ⁴¹Bjaga-jaga ai bdoa ka, apa ikam nang kono pkono pkena: roh memang ngaya, tapi kompu tonga gle." ⁴²Laju Io malan kduo derang yo ai bdoa, ulek Iyo: "O Bapa-Ku ena memang ktowong endo belo kate oro, ena belo kate belo Aku ngisop yo, jadi ka yo ptua-Ko!" ⁴³Ai des Iyo mulik nua, Iyo krapet dero desung turui, koe mato dero sundok nyantuk beta. ⁴⁴Io belo nyanda dero mbo mne laju malan ai bdoa ktolu derang yo, ai ngulek doa yo ene nua. ⁴⁵Sundok ene Io ulet nyruku murid-murid Iyo ai ngulek epo dero: "Turui ka tempo ndo ai smole ka. Eti, des Io sundok sampe, se Pea ulun snerah epo kayang ulun-ulun bdosa. ⁴⁶Uat aut, man taka malan. Iyo yo nyerah Aku sundok dmpet." ⁴⁷Des Yesus aso bunyal ulet ka doko Yudas, erai kongo ngket duo blas murid ene, ai sama-sama diang iyo erai rombongan olay ulun moit mendau ai glegada, yo snuyu koe imam-imam pngutok ai tuo-tuo bangsa Yahudi. ⁴⁸Ulun yo nyerah Iyo sundok mie pleta endo epo dero: "Ulun yo arok ku anta, ene doko yo, tangop ka Iyo." ⁴⁹Ai peles io ono se dero yo mak ngompoh Yesus, ulek iyo: "Salam Guru," laju ngarok Iyo. ⁵⁰Tapi Yesus ngulek epo iyo: "O tman, nte ene be iko ulet?" Maju ka doko dero ngop Yesus ai nangop Iyo. ⁵¹Tapi erai kongo ngket dero yo diang Yesus nyokoi kayang iyo, nyintak mendau iyo laju naris ai nadah yo epo hamba Imam Olai koe ene bekat tlingo iyo. ⁵²Koe ene ulek Yesus epo iyo: "Sulop mendau ko ene nua epo lang sarung iyo, koe ise yo makai mendau, anta sesa koe mendau. ⁵³Omoy ko be, Aku belo kuli momba Bapa-Ku, apa Io resi nyuyu sisa se duo blas psukan mlekat nte ngawat Aku?" ⁵⁴Ena ktine, ktimbe nau gnenap anta ise yo sundok tnulis lang Kitab Suci, yo ngulek, se arus jadi ktine?" ⁵⁵Montuk des ene Yesus ngulek epo ulun deo: "Omoy kam Aku endo penjahat, moko ikam ulet lengkap diang mendau ai glegada nte nangop Aku? Pdahal tongku olo Aku tunge nutui matuk mbo Bait Allah, ai ikam belo nangop Aku. ⁵⁶Tapi eka endo jadi apa gnap kati yo tnulis lang kitab nabi-nabi." Laju eka murid ene ngendikah Iyo laju buyo. ⁵⁷Sundok dero nangop Yesus, dero moit Iyo epo ngadap Kayafas, Imam Olai. Ela mne sundok bkumpul ahli-ahli Taurat ai pngentuo-pngentuo. ⁵⁸Ai Petrus nyarak Iyo ngket oro sampe mbo natar Imam Olai, ai des sundok sumba epo dalom, io tunge ekang pngawal-pngawal nte meti nau pnyundok plikara ene. ⁵⁹Imam-imam pngutok, mokin ube eka Mahkamah Agama meto ksaksian eta nte Yesus, apa Io dapet nte ukum pate. ⁶⁰Tapi dero belo kuli, beta ko nyoret deo saksi eta. Tapi pnyundok yo keo duo kongo, ⁶¹yo ngulek: "Ulun endo ngulek: Aku kuli meroros Bait Allah ai nengkuat yo nua lang tolu olo." ⁶²Laju Imam Olai ene akat, ai ngulek epo Iyo: "Belo be Iko nuing tundruh saksi-saksi endo epo Iko?" ⁶³Tapi Yesus nokon suni. Laju ulek Imam Olai ene epo Iyo: "Demi Allah yo bolum, ulek ta epo kain, beta be belo Iko ene Msias, Pea Allah." ⁶⁴Tuing Yesus: "Iko sundok ngulek aut. Tapi, Aku ngulek epo iko, mulai ngket tempo ndo iko anta kito Pea ulun tunge isan sanan Yo Mahakuasa ai ulet mbo ombon jaun ela langit." ⁶⁵Koe ene Imam Olai ene minsit baju Iyo ai ngulek: "Io nguja Allah. Ise saksi eto taka aso? Tempo ndo ikam sundok kringo uja Iyo.

Timbe san kam?" dero nuing ai ngulek ⁶⁶: "Io arus nukum mate!"⁶⁷Laju dero npus wae Iyo ai ngenjagur Iyo; ulun-ulun yo mak mupuk Iyo, ⁶⁸ai ngulek: "Soba ulek ta epo kain, Msias, ise yo malu Iko?"⁶⁹Desung ene Petrus tunge ela baling mbo natar. Laju ulet batak bawe epo iyo, ulek iyo: "Iko dor low sama-sama diang Yesus, ulun Galilea ene." ⁷⁰Tapi iyo belo ngaku mbo onon eka ulun, ulek iyo: "Aku belo tau, ise ngko ene."⁷¹Des io malan epo jawong pagar, erai batak yo mak kito iyo ai ngulek epo ulun-ulun yo keo mbo mne: "Ulun endo sama-sama diang Yesus, ulun Nazaret ene." ⁷²Ai io belo ngaku nua ai bsumpah: "Aku belo tau se ulun ene."⁷³Belo di ola ngket ene ulet ulun-ulun yo keo mbo mne ngompoh Petrus ai ngulek: "Pasti iko low erai kongo ngket dero, ene tnoan ngket otang pemesara ko." ⁷⁴Mulai ka doko Petrus mator ai bsumpah: "Aku belo tau ulun ene." Ai des jman ene sluat ka doko piak. ⁷⁵Jadi knop ka doko Petrus diang ise yo ulek Yesus epo iyo: "Onon piak sluat, iko sundok belo ngaku se Aku tolu derang." Laju io malan epo baling ai nangis diang nyoru beta.

Chapter 27

¹Des olo mulai molo, eka imam-imam pengutok ai tuo-tuo bangsa Yahudi ngumpul ai ngalek pmekat nte ngempate Yesus. ²Dero molit Io, laju moit-Iyo ai nyerah-Iyo epo Pilatus, pnguasa negeri ene. Montuk des Yudas, yo nyerah Io, kito, se Yesus sundok pnutus nukum mate, noli doko io. Laju io nempuli sen yo tolu pulu perak ene epo imam-imam pengutok ai tuo-tuo, ⁴ai ngulek: "Aku sundok bdosa koe nyerah daya ulun yo belo keo sala." Tapi tuwing dero: "Ise urusan kain diang ene? Ene urusan ko se!" ⁵Koe ene io low nurak sen perak ene epo lang Bait Suci, laju malan ngket mne mentiu nggeweng kompu io se. ⁶Imam-imam pengutok ngalek sen perak ene ai ngulek: "Belo dikate mesumba sen endo epo lang pti persembahan, koe endo sen daya." ⁷Sundok brondeng dero moli diang sen ene tana yo nulek Tana Tukang Blanga nte jadi awa kuburan ulun nyumba. ⁸Koe ene doko tana ene sampe des olo ndo nulek Tana Daya. ⁹Diang ketine gnep doko Firman yo snampe koe nabi Yeremia: "Dero nrima tolu pulu sen perak, yo ene uman yo tnetap nte erai kongo ulun ngaya nau umbang yo kati takser yo biasa mbo ulun Israel, ¹⁰Ai dero miye sen ene nte tana tukang blanga, kati nau yo pesan Tuhan epo aku."¹¹Laju Yesus pinokadap epo wali negeri. Trus wali negeri ngunti epo-Iyo: "Iko be raja ulun Yahudi?" Tuwing Yesus: "Iko se ngulek yo aut." ¹²Tapi nte tunruh yo oret imam-imam pengutok ai tuo-tuo epo Iyo, tapi Io belo di nuwing ise-ise. ¹³laju ulek Pilatus epo-Iyo: "Belo be Iko kringo bukan main kdeo tunruh saksi-saksi endo epo Iko?" ¹⁴Tapi Io ndok belo erai buku nuwing, sampe wali negeri ene eran beta. ¹⁵Sundok jadi pnepet nte wali negeri nte ngutis erai kongo ulun nukum des tongku olo raya ene ngket pnindu ulun deo. ¹⁶Ai des jman ene keo lang sper erai kongo yo ulun tau ba ktriaw iyo yo nan karan se Yesus Barabas. ¹⁷Koe dero sundok bkumpul mbo mne, Pilatus ngulek epo dero: "Ise yo ptua kam lelu yo nutis nte ngkam, yesus Barabas ena belo Yesus, yo bnomba Kristus?" ¹⁸Io se memang tau, se dero sundok nyerah Yesus koe belo gawal. ¹⁹Des Pilatus desung tunge mbo pnunge pengadilan, bawe iyo nyampe pesan epo iyo: "Nang iko lumpat urusan ulun belo keo sala ene, koe Io ene aku sesa beta lang nupi ku malom nde." ²⁰Tapi koe kese imam-imam pengutok ai tuo-tuo, ulun deo bebetua belo kate belo diang pnindu apa Barabas nutis trus Yesus nukum mate. ²¹Wali negeri nuwing ai ngulek epo dero: "Ise lelu dero duo endo yo ptua kam yo utis ku nte kam?" Ulek dero: "Barabas." ²²Ulek Pilatus epo dero: "Ena ktine, ise yo arus nte oki gawi epo Yesus, yo bnomba Kristus?" Dero eka keo oyon: Io arus snalib" ²³Ulek iyo: "Tapi kejahatan ise yo gnawi ke-Iyo?" Tapi dero makin riyes keo oyon: "Io arus snalib!" ²⁴Des Pilatus kito se usaha anta sia-sia, malah sundok mulai nyoret kekacauan, iyo ngalek danum trus muih kayang iyo mbo onon ulun deo ai ngulek: "Aku belo keo sala epo daya ulun endo; ene urusan kam se!" ²⁵Ai eka ra'yat ene nuwing: "Koe ka daya-Iyo tnanggung kain ai pea-pea kain!" ²⁶Laju io ngutis Barabas nte dero, tapi Yesus ksa iyo laju serah iyo nte salib. ²⁷Laju tentara-tentara wali negeri moit Yesus epo gedung pengadilan, laju momba eka-eka pasukan bkumpul nglekum Yesus. ²⁸Dero ngosu pnyepakai-Iyo ai nyua jubah ungu epo-Iyo. ²⁹Dero ngendaro erai mahkota dui ai mayak ban utok-Iyo, laju miye Io erai banen bulu mbo kayang sanan-Iyo. Sundok ene dero nyongkop onon-Iyo ai ngolok-ngolok Io, ulek dero: "Salam, o'raja ulun Yahudi!" ³⁰Dero nepus-Iyo ai ngalek bulu ene trus malu bulu ene epo utok-Iyo. ³¹Sundok ngolok-ngolok se Io dero ngosu jubah ene ngket kompu-Iyo trus nyua nua pnyepakai-Iyo epo Iyo. Trus dero moit Io epo baling nte salib. ³²Des dero malan epo baling kota, dero mangkoruku diang ulun ngket Kirene yo nan karan se Simon. Ulun ene paksa dero nte moson salib Yesus. ³³Sampe ka doko dero mbo awa yo nan karan se Golgota, arti iyo: Awa Tengkorak. ³⁴Laju dero miye Io ngisop anggur sampur poru. Lipas Io nyoba, Io belo kakan ngisop iyo. ³⁵Sundok nyalib Io dero ngembagi pnyepakai-Iyo diang moding undi. ³⁶Laju dero tunge ela mne ngendurung Io. ³⁷Ai mbo ombon utok-Iyo pnasang tulisan yo ngulek alasan ise moko Io nukum: "Endo doko Yesus Raja ulun Yahudi." ³⁸Sama-sama diang Io snalib duo ulun triaw gawi, erai kongo ela tadah sanan ai erai kongo ela tadah sei-Iyo. ³⁹Ulun-ulun yo lalo mbo mne nguja Io ai ulak ngilik-ngilik utok, ⁴⁰dero ngulek: "O'Iko yo kakan meroros Bait Suci ai kakan nengkorong yo nua lang tolu olo, selamat ko tah kompu-Ko se ena Iko Pea Allah, diwa ta ngket salib ene." ⁴¹Ktine low imam-imam pengutok sama-sama ahli-ahli Taurat ai tuo-tuo ngolok-ngolok Io ai dero ngulek: ⁴²"Ulun yo mak sinolamat koe Io, tapi kompu-Iyo se belo kuli Io nyelamat! Io Raja Israel? Alo Io diwa ngket salib ene apa kain anta persaya epo-Iyo. ⁴³Io mayak harapan-Iyo epo Allah: alo ka Allah nylamat Io, ena Allah sengkono kesong epo-Iyo! Koe Io sundok ngulek: Aku doko Pea Allah." ⁴⁴Ndok ulun-ulun triaw gawi yo snalib sama-sama diang Io mesala-Iyo ketine low. ⁴⁵Mulai ngket jam duo blas seom pupus ja ene sampe jam tolu. ⁴⁶Kira-kira jam tolu Yesus momba diang oyon riyes: "Eli, Eli, lama sabakhtani?" Arti yo: Allah-Ku, Allah-Ku, ise moko Iko ngendikah Aku? ⁴⁷Kringo ene, tenu-tenu ulun yo akat mbo mne ngulek: Io momba Elia. ⁴⁸Lansung ulet erai kongo ngket dero; io ngalek bungo karang, nyoso yo epo lang anggur mosom, laju nginsang yo mbo erai banen bulu trus miye Yesus ngisop. ⁴⁹Tapi ulun-ulun yo mak ngulek: "Nang, alo taka meti, ulet be Elia nte nyelamat Io." ⁵⁰Yesus momba nua diang oyon riyes laju nyerah kesong-Iyo. ⁵¹Jadi eti ka doko,

pemombong Bait Suci woka sindai ngket ombo epo iwa ai keo kelakui, ai tunden-tunden batu skak,⁵² ai kubur-kubur wingkang ai deo ulun kudus yo sundok mate nyuli.⁵³ Ai lipas pngenyuli Yesus, dero low baling ngket kubur, laju sumba epo kota kudus mekelak kompu epo deo ulun.⁵⁴ Pengutok pasukan ai prajurit-prajurit iyo yo ngendurung Yesus jadi beta-beta takut des dero kito klakui ai ise yo sundok jadi, laju ngulek: "Beta-beta, Io endo doko Pea Allah.⁵⁵ Ai keo mbo mne deo bang bawe yo meti ngket oro, yo ene bang bawe yo lumpat Yesus ngket Galilea nte nglayan Io.⁵⁶ Mbo ekang dero keo Maria Magdalena, ai Maria ine Yakobus ai Yusuf, ai ine pea-pea Zedebeus.⁵⁷ Des olo kakan malom ulet ulun tataw, ulun Arimatea, yo nan karan se Yusuf ai yo sundok jadi murid Yesus low.⁵⁸ Io malan ngadap Pilatus ai tindu antu Yesus. Pilatus nyemuyu nyerah yo epo-iyu.⁵⁹ Trus Yusuf ngalek antu ene, ngembungkus iyo diang diris yo bura brese,⁶⁰ laju melumbi iyo mbo lang kubur iyo yo bayu, yo kali iyo lang tunden batu, ai sundok nyekoling erai botu batu olai epo bowa kubur ene, malan ka io.⁶¹ Tapi Maria Magdalena ai Maria yo mak nongos mbo mne tunge mbo onon kubur ene.⁶² Olo manin iyo, yo ene lipas olo braduh, ulet doko imam-imam pengutok ai ulun-ulun Farisi sama-sama ngadap Pilatus,⁶³ laju dero ngulek: "Tuan, kain knop, se tukang pketang ene des bolum-Iyo ngulek: Lipas tolu olo Aku anta nyuli.⁶⁴ Koe ene apa snuyu nte ngendurung kubur ene sampe olo yo ke tolu; ena belo, murid-murid-Iyo anta ulet nte ngako io, laju ngulek epo ra'yat: Io sundok nyuli ngket ekang ulun mate, sampe pemeketang yo paling sori anta pawak triaw asil yo se yo tla.⁶⁵ Ulek Pilatus epo dero: "Endo tukang durung nte ngkam, malan ai durung beta kubur ene buen-buen."⁶⁶ Laju malan ka dero ai diang awat tukang durung ene dero memeterai kubur ene ai ngendurung yo.

Chapter 28

¹Sundok olo Sabat lalo, desung mato olo nyoret olo tla minggu ene, malan ka doko Maria Magdalena ai Maria yo mak, nuntun kubur ene.² Osung keo ka klakui ries koe pndiwa erai kongo mlaekat Tuhan ngket langit ai ngompoh batu ene ai nylungkang batu ene laju tunge ban ne.³ Wae-iyu kati nau ilap ai pnyepakai-iyu bura kati nau salju.⁴ Ai pngndurung-pngndurung ene nggewew koe takut ulak jadi kati nau ulun-ulun mate.⁵ Tapi apo mlaekat ene ngulek epo bang bawe ene: Nang ka ikam takut; koe aku tau se ikam meto Yesus yo snalib ene.⁶ Io mba di keo mbo mndo, koe Io sundok nyuli, sama kati yo sundok ulek-Iyo. Dido, eti ka awa Io lumbi.⁷ Ai resi malan aut ai nulek epo murid-murid-Iyo se Io sundok nyuli aut ngket ekang ulun mate. Io ono se ikam epo Galilea; mbo lane bayu ikam kito Io. Se beta-beta-iyu aku sundok aut ngulek ene epo ikam.⁸ Dero peles beta malan ngket kubur ene, diang takut ai diang ego mroa ai monsit resi-resi nte memetau ene epo murid-murid Yesus.⁹ Kolan-kolan Yesus mangkoruku diang dero ai ngulek: "Salam nte ngkam." Dero ngompoh-Iyo ai ngokop botis-Iyo ulak nyembah-Iyo.¹⁰ Jadi ulek Yesus epo dero: "Nang takut. Malan ai ulek ka epo eraibuntung-eraibuntung-Ku, apa dero brangkat epo Galilea. Jadi mbo lane doko dero bayu kito Aku."¹¹ Des dero mbo tenga boyan, ulet ka doko tenu-tenu kongo ngket pngndurung-pngndurung ene epo kota ai nyampe eka-eka nau ene epo imam-imam pngutok.¹² Des sundok brondeng diang pngntuo-pngntuo, dero pkat laju mie roa bes sen epo tentara-tentara ene¹³ ai ngulek: "Ikam arus mere, se murid-murid-Iyo ulet des malom ai ngako-Iyo des ikam desung turui.¹⁴ Jadi ena nau ene dingo wali ngri, kain anta bsara diang io, apa ikam aman."¹⁵ Dero nrima sen ene ai nggawi kati yo pnesan epo dero. Jadi kabar ene dingo mupus mbo ulun-ulun Yahudi sampe olo ndo.¹⁶ Jadi sbelas murid ene brangkat epo Galilea, epo tunden yo sundok tutui Yesus epo dero.¹⁷ Des kito Io dero nyembah-Iyo, tapi tenu-tenu kongo kerong-kerong.¹⁸ Yesus ngompoh dero ai ngulek: "Epo Aku sundok dne eka kuasa mbo sorga ai mbo dnia.¹⁹ Koe ene dnalan ka, tnampa eka-eka bangsa jadi murid-Ku ai tinombaptis beta dero lang karan Bapa ai Pea ai Roh Kudus,²⁰ ai tnutui bnatur beta dero eka nau umbang yo sundok suyu-Ku epo ikam. Jadi apa ikam tau, se Aku sama-sama diang ikam trus sampe balikbekat.